

金石學錄四卷

嘉興李遇孫輯



道光四年二月鐫

皇石學錄

芝省齋藏版



金石學錄序

古來言金石者以其可證經典之同異正諸史之繆譌而法  
物文章皆可爲多識之助故好古嗜奇之彥莫不博蒐而爭  
寶之顧三代時金多而石少漢魏以後石多而金亦無足甚  
重商周銘詞其載於經傳者皆轉易今字而古倉籀之文不  
可見漢許叔重撰說文解字山川鼎彝之銘及秦刻石字並  
加摭採此古文之賴以僅存者也自是厥後吉金樂石間有  
流傳講求者亦不乏人至宋而歐陽薛呂洪王趙諸氏藏獲  
愈富始摹搨辨識著錄成書沿至我朝通儒輩出人才特  
盛前古之珍彝寶器與夫殘碑斷碣亦日出於土田榛莽間

罔弗精審詳稽識大識小各勒一編縱世閱千年經風霜兵燹不免金銷石泐之憾而有後人以爲之輯錄則往古之奇文異字得以長存宇宙而不朽矣從弟金澗性耽金石手所搜羅甚夥暇考前人之編簡訂異辨疑不啻同堂質問而昕夕肆力於其中爰自三代以來至漢魏六朝唐宋元明以及本朝諸家凡爲金石之學者得四百餘人竝有著述以傳於世卽志一隅說一事無不備見於錄亦已綜覽而無遺漏焉夫疇人印人皆有爲之傳者誠以其專精致力不可使泯滅無聞而況金石之物世所寶貴其哀聚論釋殫心尤勤則由其人以求其書由其書以考古之鐘鼎敦彝爵卣甗鬲之


器遐陬僻壤高原古剝之碑刻無不可以供人之摩挲資人之津逮而作述之精神不至沈蕪於後世且經史之同異繆譌亦足藉以證明是則金澗之用意可不謂深且厚歟余故綴數語以序其端

道光二年歲在元默敦牂辜月富孫實甫撰

金石學錄例目

凡例

嘉興李遇孫輯



一闕百詩徵君潛邱劄記舉古之爲金石學者七事犧尊象尊律麻志儒林傳地理志銅棺秦權是也王西泚光祿作錢詹事金石跋尾序續舉十一事讒鼎銘考父鼎銘孔悝鼎銘嘉量銘柏寢銅器美陽鼎銘金人銘丹書銘始皇刻石大邗城碑柏人城西門碑是也由兩先生之說而推廣之自經典史漢迄唐五代列爲一卷蓋金石之學至宋而盛唐以前所說者不過一鱗片甲耳然溯厥原起雖得一

金石學金伯目  
一勝於什伯亦以知吉金貞石之取重於世非一日矣  
一金石至宋歐陽氏而始集其成文忠以還長睿德甫景伯  
順伯諸公無不專門名家研精考究金元寥寥數人至明  
之元敬升庵子函允伯諸公出又皆博覽旁搜立言有據  
自宋迄明列爲一卷已得百數十人俱聞歐陽氏之風而  
興起者也

一 是錄恪遵四庫館通例以

御纂諸書冠於

國朝著述之首俾海內學古之士知所宗仰焉

一 國朝亭林竹垞兩公出篤嗜金石鉤稽弗遺葑然於歐  
薛趙洪之上由是虛舟竹汀西泚山夫覃谿授堂述庵雲

臺諸先生繼起著述等身推勘深至各成不朽此文忠以  
來金石學之大宗也列爲二卷自 國初至近時又得二  
百餘人超軼宋金元明四代可謂盛矣

一 古金以款識爲重王光祿謂閻徵君所舉王肅劉杳孟康  
皆無文字則精確者唯四事耳其言誠然是以光祿所引  
左氏傳二條外今僅增禮至殺國子銘一條晉語商銘一  
條其餘左氏所載鐘鼎之屬不勝枚舉皆無文字不錄祭  
統孔悝鼎銘外增大學湯盤銘史記柏寢銅器漢書美陽  
鼎外無所增唯後漢書補仲山甫鼎一條史漢以後史書  
多載寶鼎出之文銘俱不傳唯開元十三年萬年人獲寶

金石錄卷之四  
二  
鼎四有垂作尊鼎銘十二字咸平三年乾州獻古鼎有維  
六月初吉銘二十一字於事無所證亦不錄北宋後搜獲  
甚多皆見之金石書更無庸專錄一器之存亡矣

一錄諸家姓氏而各詳其所著之書因書以見人也凡專錄  
一地僅釋一碑或文集散見劄記偶及無不摻羅同登是  
冊卽著述未傳而其人素稱好古爲諸家所引重者亦錄  
其姓氏兼有藏弄諸物銘心絕品間以所知者附錄一二  
則因人以及物也

一古甌瓦頭亦類於石刻由此可見古人文字其著錄起於  
宋趙洪二家 國初朱竹垞跋寶鼎磚林吉人圖甘泉瓦

其物尙希有近時瓦當日出於西土而吾浙之雪谿武原  
二處山巔海濱掇拾更多皆有年號可據好古者收藏而  
加以考訂亦竝錄之

一金石諸物僅以詩歌傳者不錄

一評論法帖之人不錄

一專以錢譜印譜傳者不錄

一諸公爵里事蹟不待是書而見槩從闕略蓋前代之人班  
班在史冊并有著述流傳可考近時人或稍加詳其於官  
銜別字隨筆記載卽居址亦偶及之皆未能一例也

一坵見之人或師友或子姪或同釋一物同居一地則牽連

書之

一人所見難免漏遺儻有續聞當再補輯

目錄

卷之一

左氏傳

禮至銘

讒鼎銘

考父鼎銘

周禮

嘉量銘

禮記

孔悝鼎銘

湯盤銘

大戴禮

丹書銘

國語

商銘

家語

金人銘

史記

石棺銘

始皇刻石

柏寢銅器



漢書

美陽鼎銘

後漢書

燕然山刻石

仲山甫鼎

五經文字刻石

謝承後漢書  
素宏後漢記

魏

孟康

張晏

王肅

晉

陸機

晉灼

梁

元帝

劉杳

劉之遴

後魏

崔光

江式

劉芳

酈道元

二條

楊銜之

北齊

魏收

二條

顏之推

二條

隋

劉焯

焯

唐

魏徵

蘇勗 虞世南褚遂良歐陽詢

章懷太子賢

李嗣真

張懷瓘

竇泉 蒙

韋續

徐浩 封演杜甫韋應物韓愈鄭餘慶

司馬貞

張參 唐元度

鄭承規

五代

尹玉羽

劉昫 張昭遠宋祁

卷之二

宋

郭忠恕

歐陽修 柴楊南仲

劉敞

陳文寶 李處英申屠駟李仲坦張文仲

曾鞏

司馬池 向傳師

蘇軾

黃庭堅

孫覺

鄭暘

胡宗愈

蘇望

呂大臨

呂大忠

黎持

黃伯思

李公麟

游師雄

田槩

崔君授

沈括

王黼

薛尚功

翟耆年

朱長文

董道 朱越石

吳曾

方甸

胡世將

劉涇

蔡珪

蔡條

晁博

葉夢得

趙明誠

洪适 石熙明  
張續

劉侏

李壽

席益

王厚之

石公弼畢良史朱敦儒  
劉安張韶洪憲秦禧

洪邁

羅泌

李丙 張湜

姚寬

朱子

王侏

王象之

陳思

鄭樵

婁機

程大昌

史子堅 繩祖

晁公武 張真范  
成大

趙彥衛 周必大

曾宏父 趙希弁

楊文昂

施宿

姜夔

章樵

陳樵

陸游

張世南 趙希鶴

王應麟

李燾 朱翊

周密

金

耶律隆

元好問

元

王惲

王穉 虞集

申屠致遠

趙孟頫

徐碩

吾邱衍

潘昂霄

張淑

吳萊

潘迥

陸友

單禧

鄭杓 劉有定

梁有

姚桐壽

明

陶宗儀

盧熊

宋濂

朱珪

趙古則

吳訥 宋廷佐

王世貞 孫鑛

楊慎

都穆

顧元慶

曹昭 張應文

朱存理 趙琦美

郎瑛

文徵明

沈鑑

楊時喬

王佐

陳曄

葉盛

王行

趙崧

安世鳳

盛時泰

顧啟元

孫克宏

華夏

豐道生

范欽

項元汴

周錫珪

趙宦光

均

歸有光

郭宗昌

東雲駒  
雲雛

來濬

徐獻忠

王家瑞

陳鳳梧

于慎行

孫楨

陶滋

汪珂玉

楊嗣昌

錢受徵

吳惟英

于奕正

卷之三

國朝上

欽定西清古鑑

御製重刻石鼓文序

孫承澤 炯

黃宗羲

曹溶

顧炎武 潘耒

吳任臣

黃虞稷

朱彝尊 馬思贊曹日瑚沈翼

劉凝 趙師尹朱茂皖

張弼 王瑛

馬驥

傅山

王宏撰

鄭簠 張大風顧與治

王士禛

姜紹書

萬斯同

閻若璩

臧琳

葉奕苞

程邃

鍾淵映

毛先舒

葉封

林侗 佶

顧苓

葉萬

孔尚任

高士奇

宋犖

景日昫

龔翔麟 梁同書馬履泰趙之琛

楊繩祖

周在浚

鄭元慶

顧仲清

陳奕禧

陳鵬年

汪士鋐

查慎行

吳涵

王著 王槩

王澍 陳焯

蔣衡

秦伯崕

何琦

楊賓

翁嵩年

何焯

顧藹吉

萬經

褚峻

牛運震

吳玉搢 徐堅

杭世駿 趙信符會

厲鶚

丁敬 傳

金農

倪濤

李光暎 金介復王籍渠

全祖望

汪師韓

齊召南

姜任修

汪由敦

黃華蕃

錢大昕

盧文弨

翁方綱 樹培陸恭

嚴長明 觀

汪孟錫

王鳴盛

朱筠 周棨

錢載 姜實節伊湯安沈大成胡虔江德地

紀昀 莊述祖

馮浩

周春

畢宏述 星海梧

董金甌 菽憲

盛百二

藍嘉瑄 李鯤崔儒眎

卷之四

國朝下

畢沅

黃叔璥

劉青藜

武億

王昶

謝啟昆

石韞玉

孫星衍

顧廣圻李貽德吳修

洪亮吉

阮元

朱為弼江鳳彝陸繩李伊晉

黃易

李東琪李克正高正炎

桂馥

孔繼涵

顏崇棨

沈心醇

錢大昭

東垣繹侗

程瑤田

秦恩復

沈可培

可均銘彝

金德輿

陳廣凝蔡英

朱楓

程敦

申兆定

巴慰祖

汪中

俞思謙

張埴

陳以綱

陳鱣

陳均徐紹曾許榘

丁杰

李文藻

李調元

汪照

王復

童鈺鍾敬濤

陸超曾

汪德量

孔廣森樊明徵汪肇龍吳穎芳

趙秉冲

段玉裁



邢澍

吳騫

張燕昌

開福吾進  
錢本誠

錢坫

吳東發

温汝遂

潘有為

江藩

江聲

朱文藻

趙魏

陳豫鍾

段松岑

李廓

聶欽

瞿中溶

許宗彥

周廣業

費士璣  
吳晉

曹秉鈞

文鼎姚  
江春

朱邦經

吳文溥

張廷濟

灝沅柎葛嵩  
王幾王銘壽

宋葆醇

黃錫蕃

陳鴻壽

嚴可均

張鑑

徐熊飛

李富孫

郭麐

何元錫

翁廣平

嚴杰

趙春沂孫同元  
金廷棟洪震煊

汪家禧

錢泳

司馬亶

李聘

戴光曾

斌良

素訥

馮登府

鍾振富

岳洙傳

馬鏊

馬陳潮

劉喜海

葉志詵

阮亨

陳經 丁口王 獻鈕口

徐同栢

錢玫

周中孚

龔時珍

徐渭仁 李筠嘉梅益 徵紀大復

陳璜 夏世堂

馮雲鷗

姚觀光 錢天樹

金石學錄例目

金石學錄卷一

左氏傳

嘉興李渭



僖公二十五年衛人伐邢二禮從國子巡城掖以赴外殺之禮至為銘以自誇其功以證其不知恥而詐以滅同姓之國

昭公三年叔向對晏子引讒鼎之銘以證樂不可極

昭公七年孟僖子引正考父之鼎銘以證明德後必有達者

周禮

考工記臬氏為量引嘉量銘以證量之制

禮記

祭統篇引孔悝鼎銘以證作銘之義

大學篇引湯盤銘以證日新之義案古人唯金器上刻銘國語商銘或云商鼎銘左傳禮至銘註云銘功於器後世所出比干銅盤銘及今傳散氏銅盤銘文字奇古識者以爲非三代以下物則銅盤之有銘由來已久以此比例湯盤亦金器也

大戴禮

武王踐阼篇尙父引丹書之言以戒王案丹書之訓未聞刻於何器因王西泚光祿所引存之

國語

晉語引商衰之銘以證嗛嗛之德爲不足就嗛嗛之食爲不足狃

家語

觀周篇孔子觀周入后稷之廟有金人焉三緘其口而銘其背云云以證毋多言之戒

史記

秦本紀載武王伐紂飛廉爲紂石北方還無所報爲壇霍太山而報得石棺銘以證處父之不與亂

始皇本紀二十八年始皇東行郡縣上鄒繹立石與魯諸生

議刻石頌秦德此爲嶧山刻石史公不錄其文今見鄭文  
寶摹本史公所錄者泰山刻石琅邪臺刻石之罘刻石之  
罘東觀刻石碣石刻石會稽刻石及二世刻石凡此皆以  
見史公之留意金石藉碑以證秦之巡游無度爾  
封禪書李少君見上上有銅器問少君少君曰此器齊桓公  
十年陳於柏寢已而按其刻果齊桓公器

漢書

郊祀志是時美陽得鼎獻之下有司議多以爲宜薦見宗廟  
如元鼎故事張敞好古文字案鼎銘勒而知爲周鼎  
後漢書

竇憲傳登燕然山去塞三千餘里刻石勒功紀漢威德令班  
固作銘云云迺遂封山刊石昭銘上德

又竇憲傳南單于於漠北遺憲古鼎容五斗案其銘而知仲  
山甫鼎

靈帝本紀熹平四年春三月詔諸儒正五經文字刻石立於  
太學門外又見蔡邕傳張馴傳儒林傳宦者傳蔡邕張馴  
兩傳作六經謝承後漢書碑立太學門外瓦屋覆之四面  
闌障開門於南河南郡設吏卒視之袁宏後漢紀熹平四  
年春三月五經文字刻石立於太學之前

魏

孟康註漢書律厯志據漢章帝時零陵文學奚景於冷道舜祠下得白玉琯古以玉作管不但竹也以證漢志之說不盡然

張晏註漢書儒林傳案碑而知伏生名勝

王肅釋犧尊據太和中魯郡於地中得齊大夫子尾送女器有犧尊純爲牛形以證其羽漶娑然說非是見毛詩閼宮疏

晉

陸機洛陽記載洛城南開陽門外太學漢石經諸碑

晉灼註漢書地理志魏郡黎陽據山上碑所云縣取山之名

取水在其陽以爲名以證地之名黎陽不名黎陰也

梁

元帝著碑英一百二十卷見所撰金樓子案此爲四庫館提要所引今鮑氏知不足齋所刊金樓子第五卷著書篇止載碑集十秩百卷元註云付蘭陵蕭賁撰鮑廷博案云隋經藉志梁元帝撰雜碑二十二卷碑文十五卷此作百卷疑至隋時已失其全又另載詩英一秩十卷鮑氏所刊雖亦從永樂大典錄出而輾轉鈔寫不免舛錯幸有四庫本之可正其譌也此實爲金石學之祖惜其書不傳劉杳嘗與沈約坐語及宗廟犧尊約云鄭元畚張逸謂爲畫

鳳凰尾夔娑然今無復此器則不依古杳曰此言未必可  
安古者尊彝皆刻木爲鳥獸鑿頂及背以出內酒先引子  
尾送女  
器與王  
肅同晉永嘉賊曹嶷於青州發齊景公冢又昇二尊形  
亦爲牛象皆古之遺器知匪虛也并以證象骨飾尊之說  
非是見南史

劉之遴好古愛奇在荊州聚古器數十百種有一器似甌可  
容一斛上有金錯字時人無能知者又獻古器四種於東  
宮其第一種鏤銅鴟夷榼二枚兩耳有銀鏤銘云建平二  
年造其第二種金銀錯鏤古罇二枚有篆銘云秦容成侯  
適楚之歲造其第三種外國澡灌一口銘云元封二年龜

茲國獻其第四種古製澡盤一枚銘云初平二年見梁書  
後魏

崔光於明帝神龜元年以漢魏經石彌減文字增闕表請遣  
國子博士一人料閱碑牒所失次第量厥補綴乃令國子  
博士李郁與助教韓神固劉燮等勘校石經其殘缺者計  
料石功并字多少欲補治之後靈太后廢遂寢

江式延昌中上表內說石經云蔡邕採李斯曹喜之法爲古  
今雜形詔於太學立石碑刊載五經題書楷法多是邕書  
後開鴻都諸方獻篆無出邕者魏建三字石經於漢碑西  
其文蔚煥三體復宣又劉芳經學精洽學者以石經文字

往質芳音義明辨時號劉石經俱見北史

酈道元註水經四十卷凡引漢碑百魏碑二十晉及宋魏稱是洪文惠楊升庵俱輯碑目另刻

水經註青州刺史傅宏仁說臨淄人發古冢得銅棺前和外

隱起為隸字言齊太公六世孫胡公之棺也惟三字是古

餘同今書以證隸自出古非始於秦也

此條闕潛邱所引故另列

楊銜之著洛陽伽藍記五卷引寺中所有碑志約二十條并

及漢魏石經

北齊

魏收撰魏書仿善長水經註於地形志郡縣下每引漢魏以

來石刻

魏書衛操傳桓帝崩後操立碑於大邗城南以頌功德時晉

光熙元年秋也皇興初雍州別駕雁門段榮於大邗掘得

此碑文雖非麗事宜載焉故錄於傳案光熙元年至皇興

初已三百餘年掘得此碑作史者據以入傳金石之不磨

滅如是碑文一千餘言

此條王西泮所引故另列

顏之推家訓書證篇據秦時鐵稱權旁有銅塗鐫銘詔丞相

狀縮古隸文知俗作隗林之當作隗狀也

又書證篇柏人城東北有一孤山闕駟十三州志以為舜納

於大麓即此山上有堯祠世俗或呼為宣務山或呼為虛

無山顏氏據城西門內漢碑有銘土有隴務王喬所仙知俗名宣務山之當名隴務山也案顏氏據碑以證山名若闕駟只言柏城人東北孤山爲舜納於大麓地與碑無涉王西泚引此條云柏人城西門碑闕駟且據以爲卽舜納於大麓之迹非是

二條一爲閩潛邱所引一爲王西泚所引故並列

隋

劉焯曾於開皇六年奉勅與劉炫考定漢魏石經案隋經籍志云後漢鐫刻七經著於石碑皆蔡邕所書魏正始中又立一字石經相承以爲七經正字後魏末齊神武執政自洛陽徙於鄴都行至河陽值崩岸遂沒於水其得至鄴者

不盈大半至隋開皇六年又自鄴京載入長安置於祕書內省議欲補緝立於國學尋屬隋亂事遂寢廢營造之司因用爲柱礎據此則焯炫雖奉是勅實未及考定也

唐

魏徵於貞觀初爲祕書監臣收聚石經十不存一其相承傳拓之本猶存祕府見隋經籍志又韋述西京新記云魏徵參詳考驗蔡邕三字石經凡十數段請於九成宮祕書監內置之後天后移於著作院

蘇勗記石鼓云世咸言筆迹存者李斯最古不知史籀之迹近在關中虞褚歐陽其稱古妙見元和郡縣志所引據此



則知虞世南褚遂良歐陽詢莫不稱述石鼓矣

章懷太子賢註後漢書鄧騭傳遭元元之災引岐陽石鼓文  
凡重言者皆爲二字

李嗣真著書後品贊云蒼頡造書鬼哭廩廩史籀堙滅陳倉  
藉甚秦相刻銘爛若野錦鍾張羲獻超世逸品

張懷瓘著書斷其論籀文引七略云史籀者周宣王史官教  
學童也與孔氏壁中古文異體甄艷定六書二曰奇字是  
也其跡有石鼓文存焉蓋諷宣王畋獵之所作今在陳倉  
李斯小篆兼采其意史籀籀文之祖也贊曰體象卓然殊  
今異古落珠落玉飄飄纓組蒼頡之嗣小篆之祖以名稱  
書遺跡石鼓後神品中敘史籀又云作籀文其狀邪正體  
則石鼓文存焉

竇泉著述書賦云篆則周史籀秦李斯漢有蔡邕當代稱之  
俱遺芳刻石永播清規竇蒙註云史籀周宣王時史官著  
大篆教學童岐州雍城南有周宣王獵碣十枚並作鼓形  
上有篆文今見打本

韋續集五十六種書體并序內第十五大篆書云周宣王史  
史籀所作也亦曰籀篆石鼓文是也見陳思書苑菁華其  
自序云後漢東陽徐安于搜諸史籍得十二時書皆象神  
形也又加二十三體共定五十有六則所云石鼓文者亦

似前人之說續特述之耳可見石鼓之指爲史籀由來久矣

徐浩著古蹟記有史籀石鼓文並爲曠絕之言又封演聞見記第七卷有石鼓一條有目而缺文唐人稱石鼓者約九家其見諸論說皆以爲宣王時史籀作也他若歌詠所及杜甫有陳倉石鼓久已訛之句韋應物韓愈皆賦石鼓歌歐陽文忠云韋氏以爲周文王之鼓至宣王刻詩今案韋詩起句云周宣大獵兮岐之陽又云迺是宣王史臣史籀作並不言文王時物或曰文忠所見是周文大獵兮岐之陽豈傳本有異耶然翟耆年籀史所引韋詩亦作周宣大

獵兮岐之陽則文忠自是誤讀爾至昌黎直以爲宣王之鼓因思石鼓爲周之遺寶晦於前世致後之疑者不少幸有唐儒盛稱之又得韋韓兩公作歌以傳之定爲宣王時物縱聚訟紛紛亦不得置其喙矣其有功於金石甚大又昌黎石鼓歌有羶苞席裹可立致十鼓祇載數駱駝聖恩若許留太學諸生講解得切磋等句有此願而未果至鄭餘慶始取置鳳翔孔廟則鄭君遷徙之功亦不可沒故備錄之

司馬貞史記索隱於高祖本紀據班固泗上亭長碑知母媪當作母温

張參唐大曆十年詳定五經書於論堂東西廂之壁是書不獨參考說文並能存漢石經字體開成中唐元度依參舊本撰新加九經字樣一卷請附五經文字之末兼請於國學剏立石經今長安所存石經雖鄭覃輩成之其議實發於元度也後二書同刻石附九經後

鄭承規著碧落碑釋文碧落碑唐高宗總章三年立至懿宗咸通十一年越二百餘年之久承規始有釋文但云奉命書亦非其所創也

五代

尹玉羽爲劉鄩幕吏有保護開成石經功自鄭覃等勒石壁

九經一百六十卷天祐中築新城石爲韓建所棄鄩守長安玉羽請輦入城鄩謂非急務玉羽給曰一旦敵兵臨城碎爲矢石亦足以助戰鄩然之移置尙書舊省後宋元祐中呂大忠領漕日始克盡列於學黎持撰新移石經碑記安宜之書之尙非玉羽請移於前其石久亡後人卽能好古亦無從致力則今日唐石經之燦然具備者皆玉羽之功也玉羽長安京兆人著有自然經五卷武庫集五十卷鄩辟爲保大軍節度推官仕後唐至光祿少卿

劉昫同張昭遠撰唐書載開成二年宰臣判國子祭酒鄭覃進石壁九經一百六十卷時上好文覃以經義啟導遂奏

置五經博士依漢蔡邕刊碑列於太學創立石壁九經又鄭覃傳覃奏起居郎周墀水部員外郎崔球監察御史張次宗禮部員外郎孔温業校定九經文字旋令上石至宋仁宗時宋祁歐陽修等奉勅改修唐書載鄭覃以經籍刊謬願與鉅學鴻生共力讐刊準漢舊事鏤石太學乃表周墀等是正其文刻於石又曰高重爲祭酒其覃刊定九經於石案宋祁雖宋人以類附見於此歐陽修另見後

金石學錄卷一

金石學錄卷二

嘉興李遇孫輯

宋

郭忠恕著汗簡六卷案汗簡本小學書學篆籀者宗之然所引楊氏阡銘楊大夫碑張廷珪劍銘樊先生碑碧落碑天台碑孔子題吳季札墓文字峯岳碑滅貝邱長碑王庶子碑滑州趙氏石額古虞卿碑陳逸人碑濟南碑文無錫縣碑彌勒像碑陵歆臺銘銀牀頌元德觀碑不下二十種則其於金石頗有采取考古者藉以見古刻之文字焉故錄之

歐陽修著集古錄跋尾十卷季子棐撰集古錄目錄二十卷  
金石之文多至千卷跋尾四百餘篇文忠得古器銘必屬  
楊南仲釋其字南仲學問精博與劉原父齊名手書石經  
七十五卷見宋史藝文志

劉敞在長安得先秦古器數十愛其款識文字奇古因以考  
知三代制度與先儒所說不同者著先秦古器記

鄭文寶摹刻嶧山碑以徐鉉摹本於淳化四年刻於長安國  
學嶧山翻本陳思孝云有七本今止存鄭本及金陵李處  
巽本紹興申屠駟本相較唯鄭本尙有古意七本中有青  
社本爲李仲坦所刻時阜昌甲寅也載于欽齊乘又有元

祐中縣令張文仲刻本見趙子函說

曾鞏著南豐類稿五十卷末錄金石跋僅十四則史言其嘗  
集古今篆刻爲金石錄五百餘卷惜其書不傳類稿中存  
一序

司馬池愛重古刻石鼓自鄭餘慶遷鳳翔孔子廟後經五代  
之亂又復散失池知鳳翔復輦至府學之門廡下而亡其  
一并有僞爲一鼓者皇祐四年向傳師搜訪民間足之蓋  
至是真鼓始復

蘇軾賦鳳翔八觀有石鼓歌詛楚文二篇紫桃軒雜綴云東  
坡有手鉤石鼓文篆籀全音釋備遠勝潘迪等所錄案此

金石錄卷二  
二  
卽楊升庵僞托之本不足爲東坡述也宋人自宛陵東坡  
樂城賦石鼓後作者不絕例不載唯東坡直繼昌黎作定  
爲周宣王物殊有關係故并及之

黃庭堅山谷集中雖多碑帖題跋論書法者居多如廟堂碑  
爭坐位帖之類略有考訂又嘗稱石鼓文如圭璋特達非  
後人所能贗作又詛楚文亦有釋文

孫覺守吳興時作墨妙亭於府第之北取自漢以來古文遺  
刻以實之凡三十餘通東坡有墨妙亭記蔣燦書之今其  
石以府治卑濕用填淤泥古刻遂不復見

鄭陽集荆襄川蜀金石刻爲五路墨寶旣錄碑之全文附以  
石以府治卑濕用填淤泥古刻遂不復見

已說歐陽集古攷究未備者間有辨正類爲數巨冊考證  
良備悉上秘府案陽字叔靄此書不傳見清波雜誌

胡宗愈知成都時重刻漢石經四千二百七十字有奇三體  
石經八百十九字又蘇望於皇祐癸巳得左傳拓本三體  
石經取其完者刻之凡八百十九字題曰石經遺字案宋  
史宗愈字完夫朱氏經義考杭氏石經考異引稱胡內翰  
元質獨萬氏石經考作宗愈考刻漢石經止有胡內翰一  
人必有一誤予姑從萬氏石經考錄之

呂大臨輯考古圖十卷自御府之外三十六家所藏古器物  
皆圖而錄之

呂大忠領漕陝右時命學官黎持將尹玉羽所移之唐石經徙置于府學之北墉洗剔塵土補錮殘缺分列東西次比而陳列焉明皇注孝經及建學碑則立之於中央顏褚歐陽徐柳之書下迨偏傍字源之類則分布於庭之左右於是黎持作京兆府府學新移石經記時元祐五年九月二十日

黃伯思史稱其好古文奇字洛下公卿家商周秦漢彝器款識研究字畫體製悉能辨正是非道其本末遂以古文名家子訥合其法帖刊誤及金器石刻論述編爲三卷名曰東觀餘論曾著博古圖說十一卷後之修博古圖者頗采

取焉

李公麇史稱其好古博學多識奇字自夏商以來鐘鼎尊彝皆能考定世次辨測款識聞一妙品雖捐千金不惜也善畫嘗取平生所得暨其聞睹作爲圖狀說其所以而名之曰考古圖及大觀初迺倣公麇之考古作宣和殿博古圖游師雄作唐太宗昭陵圖記太宗昭陵在醴泉縣九嶼山當時陪葬之盛與夫刻蕃酋之形琢六駿之像以旌武功列於北闕規模宏大多自朱梁盜發而後日就廢毀碑石亦剝落師雄於元祐七年權陝西轉運副使命邑官刊圖於太宗廟以廣其傳并題詞于上先於四年題昭陵六駿碑亦

金石學錄卷二  
四  
立石于太宗廟

田槩輯京兆金石六卷元豐五年王欽臣爲序皆記京兆府縣古碑所在其書不傳陳氏寶刻叢編屢引之又據錢詹事序山左金石記引宋崔君授亦有京兆石刻

沈括著夢谿筆談第十九卷器用門引黃彝銅鉦及弩機壘匣之屬皆有款識考證

王黼輯宣和博古圖錄三十卷雖辨證多踈謬然古銘字古器形尙存考古者有取焉

薛尚功著鐘鼎款識二十卷鈎摹古器銘詞爲之牋釋訂譌考異具有辨證

翟耆年著籀史俱採錄金石遺文各種之下皆坳論說括其梗槩其書不能如薛尚功之備載篆文而考述原委較薛爲詳惟於岐陽石鼓不深信爲史籀作則其識見不如尙功耳

朱長文著墨池編二十卷敘述歷代著作窮字學之原委末坳文房器用其十七卷十八卷專敘碑刻自周秦起唐碑止不下千通其書撰人及年號地址卽注於下獨唐碑以類相從分墓銘讚述佛家道家祠廟宮宇山水題名藝文傳模凡十門然伯原此書以書法爲主是以第十六卷雖專錄集古跋尾而亦不全錄白云議論及書者則錄之



可知其用意所在也

董道著廣川書跋十卷多考訂金石之文據左氏傳成有岐陽之蒐以石鼓爲成王時作又載朱越石與兄書論石經甚詳惟漢魏一字三字之分尙未明晰

吳曾著能改齋漫錄力辨石鼓文出于周宣王史籀大篆引蘇勗載記等說以爲證

方甸以石經殘碑在洛陽張景元家世傳蔡中郎書未知何據遂詳考之仍隋經籍志之說以一字爲魏石經不知經籍志雕本相沿譌三爲一朱竹垞太史經義考辨之在經籍志之序漢魏次第本不誤耳至公羊碑有馬日磧等名

乃云魏世用其所正定之本因存其名洪文惠嗤其爲謬論信夫甸是跋載其兄勺所作泊宅編

胡世將著資古紹志錄多考訂金石文其所藏石鼓文在集古之前比永叔所見四百六十五字僅益九字宋儒所見石鼓文並無全本愈知楊升庵所云從李文正家得唐拓本及見東坡之本皆僞託耳

劉涇輯成都刻石總目三秩時元祐中蔡京帥成都以意授涇纂府縣碑板幢柱自東漢初平迄僞蜀廣政凡二百六十八又成都有漢王稚子闕作文記之得以永存其文載國朝成都通判陳祥裔蜀都碎事中

金石學錄卷二  
蔡珪輯金石遺文

蔡條著古器說見鐵圍山叢談歷敘前代得古器之可貴至宋劉原父倡於前歐陽公繼之由是李伯時繪圖以傳及大觀初倣伯時所作成宣和殿博古圖凡所藏大小禮器已五百有幾政和間爲最盛尙方所貯至六千餘數百器時所重者三代之器若秦漢間物非殊特不收及宣和後又皆貯錄且累數至萬餘而宣和殿後又剏立保和殿左右有稽古尙古博古等閣以貯之俄遇都邑傾覆悉入金營散落不存惟圖錄規模班班尙在可以流傳不朽耳其言大略如是

邵博著聞見後錄三十卷內載近年洛陽張氏發地得石十數蔡伯喈隸尙書禮記論語各已壞闕論語多可辨每語必他出至十數語則曰凡章若干

葉夢得取古碑所載與史違誤者爲金石類考五十卷其所著避暑錄話中載劉原甫識赫連勃勃所鑄龍雀刀及韓丞相汝玉家藏王莽新始建國天鳳上戊六年所造銅料甚有考訂

趙明誠著金石錄三十卷聚古碑二千卷仿歐陽集古錄例編排成帙凡目錄十卷跋尾二十卷紹興中其妻李清照表上於朝

洪适著隸釋二十七卷續二十一卷漢碑之存者以今文寫之而爲之釋又爲世代譜及物象圖碑形式悉具之魏初近古者亦附焉又同時有石熙明聚碑最富文惠假得成此書石氏曾摹熹平石經文惠亦有蓬萊閣漢石經之刻計千九百餘字張纘有石經跋頗於隸續之外有所考訂又謂以三體叅校其文而書丹於石則定爲隸後儒稱其說爲獨得

劉球著隸韻十卷引漢碑連碑陰共百六十通足資考證宋時有石刻爲德壽殿本近維揚秦敦甫太史得之重墨諸版稱其采獲之勤編次之多闡洪氏之緒餘導字原之先

路雖不無踈畧處然未可以微類掩其全璧也

李壽字吳崑紹興中爲雅州郡從事卽於雅州得漢碑蜀郡掾治道記其碑紀年號云建武中元二年與范紀袁宏後紀司馬溫公通鑑不冠建武止稱中元異崑考司馬彪祭祀志改建武三十二年爲建武中元元年合之碑記正同知官書累經校定妄意刪去宋鄭公嘗輯紀年通譜曾疑紀志不合惜諸大儒未見此碑不及改正永叔著集古錄謂可正史傳缺謬惜此記又不使永叔見之也

席益修葺蜀石經作記畧云僞蜀廣政七年其相毋昭裔按雍都舊本九經命平泉令張德釗書而刻諸石本朝因禮

殿以祀孔子故蜀帥尙書右丞胡公宗愈作堂於殿之東  
南隅以貯石經益又補刻孟子十四卷晁公武謂其多誤  
字

主厚之著復齋碑錄又著石鼓文詛楚文音施宿稱其稽古  
成癖至忘饑渴石鼓考辨尤爲精詣又紹興中秦相子熺  
居賜第十九年日治書畫碑刻因輯所藏鐘鼎款識一冊  
後歸順伯每款鈐以復齋珍玩厚之私印且爲釋文疏其  
藏弃之所此冊輾轉流傳 國初曹倦圃朱竹垞馬衍齋  
藏後今爲阮氏琅嬛僊館所刊又案積古齋跋云王氏款  
識五十九種皆復齋所輯搨本中有畢良史牋識十五器

廼秦熺之物此外周師旦鼎楚公鐘虢姜鼎亦一德格天  
閣中之物其餘數十種則朱敦儒劉炎張詔洪憲等人所  
藏其方城范氏古鐘及末葉楚公鐘廼石公弼所藏北宋  
搨本復齋得之續於冊後者也因備錄以存其姓氏

洪邁著容齋五筆內載唐平蠻碑以證明皇之用內侍高守  
信主兵柄不始於肅代之用魚朝恩吐突承璀也駁正博  
古圖謬妄之說一書再書又古鐔于三代鐘鼎銘識犧尊  
象尊宋十八鼎皆論之甚詳則文敏之研究金石亦何減  
於文惠乎

羅泌著路史有宋公成之齶鐘說及劉耽篆呂梁碑考二篇

金石錄卷二  
九  
考證極詳

李丙類其所有金石起夏后氏竟五季著於錄者千卷號博古圖正訛見張溟雲谷雜記溟亦留心金石雜記中歷敘歐陽公集古錄曾南豐金石錄趙德甫金石錄葉石林金石類考洪文惠隸釋續及李氏博古圖正訛諸書并力辨石鼓之出於周宣王可信近時韓元吉以爲成王時物未可遽以爲然若任汝弼以石鼓文其端皆剗因秦篆書以漆之故推爲秦時物更非所敢聞也其論頗正故並錄之姚寬字令威著西溪叢話三卷考證典籍外亦及金石會上會稽尋秦刻石無所得自小逕至鵝鼻山頂有石如屋大

中挿一碑於其中文皆爲風雨所剝當是秦碑非始皇之力恐不能致此也又載詛楚文有三本說甚詳備東魏大覺寺碑陰題銀青光祿大夫臣韓毅隸書蓋今之楷書也知唐以前皆謂楷字爲隸歐陽集古錄誤以八分爲隸書也惟以漢石經爲三字魏石經爲一字則考据未詳耳

朱子少好古金石文自恨家貧不多得出先世所遺益以己所搜不過數十種爲橫軸懸之壁凡循行卧起恒不去目以爲樂又以石鼓文有似車攻甫田詩推爲宣王時作見詩傳遺說

王休著嘯堂集古錄二卷聚古器款識各以今文釋之

金石錄卷二  
王象之輯輿地碑目四卷以天下碑刻地志之目分郡編次而各註其年月姓氏於下起臨安訖龍州皆南渡疆域象之著輿地紀勝二百卷傳本甚少此碑目卽從紀勝中摘出單行

陳思輯寶刻叢編二十卷多列古碑之目與王象之輿地碑目畧同然象之自河淮以北槩屬闕如唯是書於諸道郡邑綱分目析沿革釐然竹垞先生曾欲採所引隸續以補洪書二十一卷之缺

鄭樵輯金石畧又有集古系時錄系地錄二書因石鼓文以殿爲也見於秦斤以丞爲丞見於秦權謂是秦篆以石鼓爲秦時物起于任汝弼而夾漈爲揚其波矣

婁機著漢隸字原以漢魏碑字依韻書分爲二百六部編爲五卷引漢碑三百有九魏晉碑三十有一各紀其年月地里書人姓名文字異同間有考證不僅爲書家取法已也程大昌輯雍錄有石鼓考以爲成王時作甚辨核又其所著攷古編中以瑯琊臺碑文證秦以前已嘗石刻亦精確

史子堅字勤齋好古博雅生平精於篆隸行草殘碑斷刻靡不搜訪自集隸格一冊以補洪景伯漢隸之缺淳熙二年邛州蒲江縣僧院中得石刻二十九字云永熹元年二月十二日蜀郡臨邛漢安鄉安定里公乘校官掾王幽字珍

儒勤齋釋其爲漢隸無疑公乘校官皆漢制也惟永熹之號不見於史考冲帝卽位所改之元史傳相傳以爲永嘉止一年熹與嘉文字易貿亂是年帝甫二歲梁太后臨朝按說文熹者悅也取喜悅以名元而冠以長久其太后之意歟况熹與熹古通用安知不與延熹熹平光熹等年號同耶是亦校讐者之誤改說甚辨博孫繩祖著學齋佔畢四卷內載石室壁間刻古聖賢義夫節婦及車馬人物卽武梁祠石象也今錢唐黃小松司馬於嘉祥縣之紫雲山摻得之而繩祖謂此碑在資州宅博雅堂下制閩又輦運寘之明新豈當時蜀中有翻本耶又以梁高行至范且爲

第一碑伏羲至樊於其頭爲第二碑使者長婦兒至縣功曹爲第三碑皆足以資考核按繩祖因其大父隸格中所錄是碑後護漕攝憲梓部行部至資州得碑立所在遂識其事

晁公武著石經考異取蜀石經與後唐板本參校之經文不同者三百二科著石經考異亦刻於石張貞又按註文同異爲石經註文考異四十卷張氏又刻古文尙書於石又范成大有石經始末記

趙彥衡著雲麓漫鈔載國山碑以今文寫之不免訛舛又周必大著汎舟錄亦述是碑并辨碑詞載所遣官姓名無周

處以史爲誤

曾宏父著石刻鋪敘先敘高宗御書石經及蜀石經頗詳備餘俱論帖又趙希弁蜀石經考其所錄經註字數與曾氏畧有增減卽引石刻鋪敘爲證

楊文昂著周秦石刻釋音載石鼓文詛楚文秦嶧山泰山諸碑

施宿著石鼓文音以先後所得北方之本及石林葉氏本訂其筆意以成是書

姜夔著保母輒跋甚詳核

章樵注釋古文苑以所載石鼓文取薛尚功鄭樵王厚之施

宿諸家之說雜錄爲一編後潘廸撰音訓都所採取

陳慥著負暄野錄二卷其上卷多論石刻

陸游跋唐昭宗賜錢武肅王鐵券文

張世南著宦游紀聞內辨古器款識及顏色制度極詳備又趙希鵠著洞天清錄其辨古鐘鼎彝器更精審陶南村推二書之論古金爲粲然具備洵不虛矣因並錄之

王應麟輯玉海藝文門歷代石經俱有論次器用門述鼎彝尊彝之屬徵引甚爲詳備又所著困學紀聞小學門論金石八則更精確

李燾撰長編載嘉祐六年三月以篆國子監石經成賜草澤



金石錄卷二  
章友直銀百兩絹百疋除試將作監主簿辭不就故有是  
賜案北宋篆石經尙有謝餗張次立楊南仲皇姪克繼等  
或賜銀幣或賜出身見宋史玉海所錄長編未載又朱翌  
云本朝石經胡恢所書此又爲玉海諸書所未載除王應  
麟已錄外而朱翌之述石經亦當附見者也

周密著雲煙過眼錄四卷續錄一卷於古器略品甲乙而不  
甚考證記嘉祐石經云羅壽可游汴梁見太學九經石堆  
積如山一行篆字一行真字

金

耶律隆有修葺石經功明安世鳳曰石經自漢以蔡邕名今

并其拓本亦不存唐序注孝經始刻石立臺而表章之功  
不足償離經之罪惟文宗以羣經刻于碑院至今嘉惠學  
者乃經宋中葉之亂淪于燕幾不能存迨正隆四年方爲  
耶律隆所修則石經之所以長至今日者皆其功也其記  
字仿石經亦稍形似案安氏所云耶律隆修經事似指唐  
石經言但所謂淪于燕幾不能自存考唐石經未嘗移至  
燕朱竹垞檢討經義考引安氏說在金太學石經下作按  
云金時石經未審何年所刻殆移自汴京與石鼓同据其  
說則耶律隆所修者宋嘉祐石經也然遷徙事亦無明徵  
卽金史劉彥宗對二帥語恐有其言而無其事况明陳永

之署開封府庠事猶及見宋太學中經碑石今則沈于黃河淤泥之下矣亦檢討案中語也前後未免矛盾然則安氏果何所指耶

元好問著故物譜其說略曰三代鼎鐘其初出於聖人之制今其欵識故在不曰永用享則曰子子孫孫永寶用豈聖人者超然遠覽而不能忘情於一物耶自莊周列禦寇之說出遂以天地爲逆旅形體爲外物雖聖哲之能事有不滿一呷者況外物之外者乎然彼固未能寒而忘衣饑而忘食也則聖人之道所謂備物以致用守器以爲智者其可非也耶

元

王惲著秋澗集推夏承碑爲中郎筆集中跋蔡中郎隸書云中郎本取秦相斯大小篆爲八分實秦隸書也近觀公建凝三年所書五官功曹掾夏承墓表真奇筆也如夏金鑄鼎形模怪譎雖蛇神牛鬼厖雜百出而衣冠禮樂已胚胎乎其中所謂氣凌百代筆陣堂堂者乎至元辛未中秋前二日觀又惲有修理大都南京石經事狀

王檝以元初都城廟學燬於兵取舊樞密院復創立之春秋率諸生行釋菜禮仍取舊岐易石鼓列廡下見元史周櫟園云石鼓迄今無恙檝功也帝京景物畧載石鼓原流不

及檄按石鼓大觀中歸於京都辟雍又遷置保和殿金填  
其文金人得汴梁鼓亦北徙留王宣撫宅宅後爲大興府  
學虞集助教成均言於時宰得置之國學大成門內見伯  
生自記

申屠致遠元初官杭州路廉訪經歷時西僧楊璉真伽取宋  
高宗所書經石壘塔致遠力爭而止南宋石經之存於今  
致遠力也致遠壽強人素有文名蓄書甚富號爲墨莊  
趙孟頫藏復齋所輯款識用大雅印章兼書薛尚功攷證於  
曾侯鐘後冊首鐘鼎款識四篆字亦其所書於時錢德平  
柯九思王蒙陳惟寅均賞鑒是冊有圖記

徐碩撰至元嘉禾志三十二卷碑碣一門多至十一卷金石  
文字考證最詳

吾邱衍著學古編爲篆刻印章而作又周秦石則釋音以楊  
文昂著周秦石刻釋音中所取瑯琊碑不類秦碑不應收  
入因重加刪定以成此書

潘昂霄著金石例十卷案蒼岷此書專示作文之式非考訂  
金石也然墓志之始條下引王戎墓銘比干銅盤銘延陵  
季子墓銘漢滕公夏侯嬰得定葬石銘墓圖條下引南陽  
宗資墓石刻字則於古碑亦有引證處不獨取材於昌黎  
集也

張淑釋比干銅盤銘延祐間衛輝路學正王公悅臨摹汝帖刻於石上淑因釋其文案銅盤銘非必出於比干而文字奇古自非漢以後物張淑之釋何可沒其姓氏

吳萊嘗得漢石經六紙證明漢一字石經以息從來浮議因賦漢一字石經歌有熹平厯正始洛土重求索衛侯師邯鄲三體精筆畫煌然立其西學者常嘖嘖史書竟差舛一字幾不覲等句

潘廸著石鼓文音訓取鄭樵施宿薛尚功王厚之諸家之說考訂其音訓刻諸石案宋人釋石鼓未有刊石垂諸久遠者潘氏獨能萃諸儒之說而鑄之太學至今與石鼓並列後人得以知其音義

陸友精賞鑒工篆隸著研北雜誌二卷援北史證馬定國以石鼓出宇文周之非於古器頗有考證

單禧著漢校官碑釋文卽洪氏釋文而重訂之於洪氏所闕者得八字又異同者二字

鄭杓著衍極其第二卷論瘞鶴銘劉有定爲之釋更爲詳備見陶南邨較耕錄

梁有天厯間奉勅厯河南北錄金石刻三萬餘通上進類其副本爲三百卷曰文海英瀾于濟得漢刻九于泗水中葛邏祿廼賢寄九思詩云泗水中流尋漢刻泰山絕頂得秦

碑是也

姚桐壽著樂郊私語一卷內辨六里山天冊碑足資考證

明

陶宗儀輯古刻叢鈔錄碑七十二種雖無論說而所錄諸碑首尾完具多世罕見可備考證

盧熊著國山碑考其考覈視諸家爲詳

宋濂考壇山刻石吉日癸巳四字爲周穆王書無疑趙子函

說

朱珪著名蹟錄六卷增錄一卷皆珪所自作文自刻字而輯之與古碑無涉然後之欲考珪同時之石刻則於斯編亦

有所取矣

趙古則著石鼓論以爲宣王時作甚爲辨核吳坦跋以爲獨能脫畧舊聞辨正浮議定爲籀文而不惑其高見遠識可謂度越前人什伯矣

吳訥宣德間按浙因宋高宗御書石經向在書院後卽書院建仁和學經石殘缺屬知府盧玉潤收拾得全碑及碎折共百片昇置殿後及兩廡焉後天順三年改建縣學碑石悉徙至正德間宋廷佐按浙復移置諸石於府學并聖賢圖像及表忠觀碑俱一一分置廊廡間楊一清有記述石經原委頗詳

金石學錄卷二  
王世貞著弇州山人四部稿續稿又著古今法書苑七十六卷自四十五卷至末卷俱錄金品石品稿中諸碑刻題跋才學富贍辨論亦精核在明儒中當首屈一指焉孫鑛著書畫跋跋三卷續三卷因元美有書畫跋鑛又跋其所跋故重文見義內有跋碑刻一卷續跋中改碑刻爲墨刻楊慎輯金石古文十四卷錄三代秦漢石刻最富俱鈔列全文如隸釋之例間有跋語漢碑之殘缺者以洪本足之然五鳳墳壇居攝諸刻皆存曲阜係漢碑之近古者俱不錄則又不無遺漏之憾升庵學問該洽而有意翻駁故多踳謬如錄石鼓文七百餘字之類更不足信與弇州有間焉

又著法帖神品目一卷自古篆雜碑以及淳化諸帖約百數十種

都穆著金薤琳琅二十卷古碑皆錄全文各爲辨證畧仿隸釋而增隋唐碑文又著吳下冢墓遺文三卷專錄吳中銘志之文凡三十四首

顧元慶著瘞鶴銘考元慶爲都元敬弟子所錄銘詞跋語蓋從元敬得之

曹昭著格古要論分十二門古銅器古碑俱有論次考證頗詳張應文著清祕藏二卷亦分門別類於古器皆能審定朱存理推明代第一收藏家江南通志云元季明初中吳南

園何氏笠澤虞氏廬山陳氏書籍金石之富甲於海內繼其後者存理其尤也著珊瑚木難八卷借所存俱名蹟而金石尙未哀錄又世傳鐵網珊瑚十六卷亦題存理撰今四庫館定爲趙琦美所編趙古則石鼓跋亦載是書其援引足以資考證

郎瑛著七修類稿五十卷辨證一門畧有考訂金石之文文徵明擅分隸刻停雲館法帖然於古墨刻亦有考訂嘗跋石經略云小字石經殘本百葉約萬有五千言前後斷缺無書人名氏余考之蓋宋思陵書也紹興二年帝宣示御書孝經繼書易詩書春秋左傳論孟及中庸大學樂記儒

行經解刻石太學孝宗建閣奉安名曰光堯石經之閣卽此是也又漢蕩陰令張遷碑爲歐趙洪鄭所未錄徵仲收得之楊升庵据以入金石古文

沈鎰著岫嶠碑釋文鎰係楚人夢神禹授以古瓶下有篆文類碑字及早起誦若素識不勞深索楊用修好奇士也遂信之廼作禹碑歌抑亦英雄欺人耳何可據以爲實見因樹屋書影

楊時喬著岫嶠碑釋文案岫嶠碑釋文共有五家始於楊升庵於是郎瑛沈鎰楊時喬杜壹繼之所釋有異同大抵不免穿鑿

金石學錄卷二  
王佐著新增格古要論十三卷卽取曹明仲本增輯之又有  
金石遺文碑帖集

陳暉輯吳中金石新編八卷時通判蘇州因取吳中各碑記  
標題分數凡六門

葉盛著棗竹堂碑目

王行著墓銘舉例四卷爲例十三取蒼岷書而廣之補之也  
趙嶠著石墨鐫華八卷積三十餘年之力總所藏二百五十  
餘種裝潢堅確每一冊後親裁一跋辨論皆精博可據  
安世鳳著墨林快事十二卷錄金石款識起三代迄於明世  
頗推博雅

盛時泰著蒼潤軒碑跋一卷續跋一卷時泰上元人所紀金  
陵六朝諸蹟爲多案時泰字仲交王漁洋香祖筆記謂其  
家多藏書書副頁上必有字或記書所從來或記他事往  
往盈幅皆有鈐印吳山夫得其手跋魏上尊號受禪二碑  
稱爲佳蹟

顧啟元著金陵古金石考一卷以年代排纂各紀所在及撰  
書人姓名

孫克宏著碑目三卷略仿陳思寶刻叢編之例舛謬甚多劉  
侗作于司直天下金石志序詆雪居曰李翁郝閣頌陝則  
曰冀潁川荀淑碑吳則曰潁他不勝舉也



華夏搜羅極富居錫山築真賞齋以儲古碑刻鄞豐人叔嘗  
爲作真賞齋賦云夏承襲壽漢碑樂毅東方晉刻牙籤錦  
笈以爲藏天球河圖而比重也有真賞齋帖火前本爲有  
明一代墨刻之冠人叔名道生原名坊輯金石遺文五卷  
又刻僞石經大學後人唾爲狂生者也

范欽居四明天一閣藏書名重海內其藏弄碑刻尤富顧世  
無知之者乾隆癸卯錢竹汀詹事游天台道出鄞適張文  
魚以鉤摹北宋石鼓文厲范氏而侍郎六世孫葦舟亦耽  
嗜法書因言天一石刻之富不減歐趙而未有目錄廼相  
約譔次之自三代訖宋元凡五百八十餘通以時代先後

爲次并記譔書人姓名俾後來有考明碑亦有字畫可喜  
者以近不著錄仿歐趙之例也碑目雖編於近日而收獲  
之勤則出自前人故仍以侍郎姓氏登諸錄焉

項元汴富於藏弄朱竹垞檢討跋其所藏萬歲通天帖云子  
京能鑒別古今書畫金石文玩物蓋子京賞鑒極精至今  
天籟閣遺物有其題識者人皆珍之而金石刻亦摻羅不  
少也

周錫珪著唐碑帖跋四卷末附五代楊凝式一碑

趙宦光精小學收藏古刻甚富其石鼓文有篆書手題者今  
在張叔未家子均著金石林時地考二卷仿陳思寶刻叢

編之例編次郡省分別時代以便訪求

歸有光文集中有碑跋六則并金石錄隸釋二跋

郭宗昌著金石史所論碑止五十種辨別真贋具有心得允伯長子分隸與蓋屋趙子函同有金石之癖當時稱關中二士唯自負太高所以抱經學士頗不滿其書然其精審處自不可沒 國朝王山史所藏西嶽峯山廟碑卽允伯物向藏華陰東雲駒雲雛兄弟之墨莊樓雲駒以贈允伯蓋其兄弟皆嗜古收蓄古刻甚多

來濬著金石備考十四卷裒輯甚草略然漢安仙集字歷來金石家俱未著錄孫退谷見其搨本而未審石在何處獨

來氏載之云在四川簡州逍遙山石窟中

徐獻忠輯金石文朱竹翁經義考曾引其所著吳興掌故內所錄高宗御書孝經一則

王家瑞輯咸陽金石遺文

陳鳳梧任河南按察使以宋嘉祐石經入明歸於開封學宮殘斷不完立石紀其本末今已無存天一閣尙藏其本其記以重勒石經推重宋大儒抑知勒石爲楊南仲胡恢諸君理學諸儒尙未出也考據之疎如此見全氏鮎埼亭集于慎行著筆塵其說漢石經云洛陽石經晉末未嘗損失至元魏馮熙常伯夫相繼爲洛州刺史取之以建浮屠精舍

大致頽落聞有存者委於榛莽其後侍中崔光請遣官守視補其殘缺竟不能行而古迹泯矣視焚書之慘輕重不同其爲吾道之厄一也

孫楨著金石評考

陶滋著石鼓文正誤二卷以前人所釋石鼓不免舛譌因親至大學旁抉剔刻文校定

汪珂玉著珊瑚網古今法書題跋二十四卷皆評論碑帖及名家墨蹟

楊嗣昌輯惠山金石錄

錢受徵著吳越備史錄武肅王鐵券其說甚詳

吳惟英崇禎中與鞏都尉永固留心圖史家有墨響齋摹拓金石文字裝池插架不減歐薛洪趙之富

于奕正著天下金石志載古來金石之所在分省及府州縣略註撰書人姓名年月亦間有所考證末錄無考漢碑百餘種司直自云考集古金石等書漢碑存者不滿三百版內一百餘版未詳何屬埶載以俟詢考然其書半據志乘所有錄其名目安能如都楊趙郭之精研其事哉道聽塗說之譏斯不免矣又同劉侗著帝京景物略頗敘石鼓原流

金石學錄卷二

金石學錄卷三

嘉興李遇孫輯

國朝上

欽定西清古鑑四十卷謹案簡明日錄云乾隆十四年奉

敕撰皆卽 內府庋藏古器繪圖列說體例雖仿考古諸圖而援  
據經典辨別款識一一考證精核無所牽合附會於其間  
則萬非諸圖所及也

御製重刻石鼓文序謹案乾隆五十五年

高宗純皇帝臨雍講學見石鼓原刻懼其歲久漫漶爲立重欄以  
蔽風雨別選貞石摹勒十鼓之文俾海內士人便於椎拓

御製序從韓愈詩定爲宣王時物洋洋

聖謨昭示萬古可以息從前經生家之異議矣

孫承澤著庚子銷夏記內有石刻四卷侍郎富於收藏推賞鑒家議論頗稱博洽孫炯有研山齋珍玩集覽及研山齋雜記二書其於銅器亦有考辨蓋承其遺緒耳濡目染具有淵源耳

黃宗義著金石要例一卷標三十六例以補蒼岷書之缺其考訂較王止仲更密

曹溶著古林金石表侍郎藏碑之富甲於東南自行塞上始爲蒐羅積五年得八百餘本裝界精整有一定之分寸不

得稍有參差每冊必手書其籤而按勘之至今人稱爲曹籤云

顧炎武著金石文字記六卷又石經考共錄金石文字三百餘種其自序云抉剔史傳發擢經典頗有歐趙二錄所未具者非虛語也又著求古錄一卷共碑五十六種每刻必載全文用隸釋之例又潘耒著補遺二十餘條附刻先生金石文記後稼堂受業先生之門於金石亦多所考證

朱彝尊著曝書亭集內四十六卷至五十一卷皆金石題跋考據精鑿與顧氏金石文字記稱抗手繼前賢開後學於兩先生實無愧焉又案先生本有吉金貞石志後併入諸

金石學錄卷三  
題跋於全集中不復成此書矣又經義考中有石經考日  
下舊聞末附石鼓考海昌馬寒中住花山築道古樓貯藏  
書籍金石先生爲賦君平遺鏡歌及宋拓鐘鼎款識跋新  
莽錢范跋仝里曹仲經好集金石文字先生爲作吳大安  
寺鐵香鑪題名跋北齊少林寺碑跋唐騎都尉李君碑跋  
沈棻畦爲藍邨先生子工八分愛金石刻先生爲作開元  
太山銘跋馬名思贊又姓朱於先生爲叔姪曹名曰瑚沈  
名翼俱受業先生之門

吳任臣著十國春秋其於蜀載石經云廣政十四年詔勒諸  
經於石秘書郎張紹文寫毛詩儀禮禮記秘書省校書郎

孫明古寫周禮國子博士孫逢吉寫周易校書郎周德貞  
寫尚書簡州平泉令張德釗寫爾雅字皆精謹

黃虞稷收藏經籍甚富并及石刻說漢石經云漢石經殘碑  
見於洪氏隸釋者尚書僅五百四十七字視孔安國多十  
字少二十一字不同者五十五字論語載盍毛包周有無  
不同之說公羊亦有嚴顏異同而詩則魯故所傳非毛鄭  
訓故此足貴也

劉凝著石鼓文定本以拓本爲主參以薛氏鐘鼎款識其例  
凡拓本全者用圓圍識之彷彿者無圍拓本所無以薛本  
補者用方圍併雜採詩文薈萃成書按劉氏定本竹翁未

見其書故曰下舊聞不引而舊聞采書目內有趙氏師尹石鼓文考注朱氏茂皖獵碣考異二書

張弢承父致中儲藏鼎盃碑版之富弢尤博學嗜古究心金石之文後以聾廢而考證彌勤著昭陵六駿贊辨濟州學碑釋文又著瘞雀銘辨親至焦山仰臥而手拓之較宋黃長睿董道所載多得八字所辨較明顧元慶爲詳核又有王瑛亦嘗拓此銘而考之厲樊榭瘞鶴銘句云張王近事僧指說奇險欲動魚龍聽自註云張弢王瑛暴書亭集有焦山剔銘圖爲王副使瑛作

馬驕著釋史內宣王中興錄石鼓文并音訓名物訓詁器用門錄古金器六七十種惜無所訂證

傅山撰述未見阮亭先生稱其工分隸及金石篆刻潛邱徵君稱其長於金石遺文之學每與余語窮日繼夜不止并問潛邱金石文字足以正經史之譌而補其闕始於何代何人因舉七事以對蓋先生爲山右老宿孳孳考古所著惜未流傳世間耳

王宏撰撰述亦未見先生居華山下爲郭允伯後輩卽刻其所著金石史以薦舉鴻博至京師所攜漢華山廟碑唐貞觀石刻金剛經等皆允伯物一時講金石學者皆宗之惜其著述未顯因與青主先生同列以待訪求

鄭簠著各碑跋搆園於金陵城東顏曰灌木樓蒐求漢魏以來金石碑版時與張大風顧與治相考證分隸爲國初第一手與竹垞先生先徵士秋錦公稱石交子家及朱氏堂額楹帖俱出其手生平臨漢碑最多必有跋尾子家僅藏臨邛易令曹全碑一本其跋已刻於觀妙齋金石文字考略中又吳槎客國山碑考錄其天發碑釋後跋惜當時未有哀集而存之者能無與青主山史兩先生同一慨乎王士禎以祭告使秦蜀亦留意金石刻著秦蜀驛程後記王穉子東西二關皆有記錄并記後人題字頗詳核姜紹書著韻石齋筆談二卷於金石亦有論說

萬斯同著石經考一卷執後漢書儒林傳序爲古文篆隸三體書法以參校一語欲翻一字漢刻三字魏刻之案則惑矣後錄唐宋石經較詳於亭林先生石經考亦足補其未備爾

閻若璩著潛邱劄記與傅青主論金石學舉七事以對又述顏氏廟碑真卿兄弟七人真卿行六碑稱第七子似誤餘無論說

臧琳著經義稊記三十卷內說隸續載魏石經左傳遺字中有尙書三篇文後段懋堂大令著尙書撰異亦嘗言及實先生發之也又以熹平石經自洪黃兩家所載外槩未之



見唐張參五經文字上列說文下列石經嗜古之士欲觀中郎遺跡不可不讀因輯錄之又說犧尊云毛傳犧者沙羽飾古義獻沙聲相近毛詩傳爲先秦古書二鄭咸所依據後世卽出犧牛之尊要不得以此改詩禮之義終是王肅好與鄭難故爲異說耳其所論皆有獨見

葉奕苞著金石補錄先生自試鴻博放歸專心著述并及金石其搜羅考訂皆有根柢漢隸殘碑自然之性百餘字從來不見於著錄惟先生書載之以資後人考核亦可見其收獲之富矣

程邃嗜古能識奇字嘗爲王子底吏部釋焦山古鼎銘辨其可識者七十有八字存其疑者八字不可識者七字吏部爲長歌述之

鍾淵映與朱竹垞太史共註歐陽文忠五代史太史游雲中轉客太原訪沙陀北漢故蹟殘碑斷碣靡不摩挲抄撮廣漢亦多所攷證見太史谿州銅柱記跋

毛先舒著思古堂集石鼓跋從程大昌之說以爲成王時作極爲辨核石經亦有考證經義考採之

葉封著嵩陽石刻集記二卷時官登封知縣錄境內古碑而成此書其辨論推爲博洽

林侗喜錄金石文嘗攜拓工厯唐昭陵陪葬地得英公李勣

以下十有六碑著來齋金石考三卷錄碑二百二十種其說皆有典據弟佶著漢甘泉宮瓦圖記并蘭話堂碑目顧苓有塏影園鐘鼎款識一冊現藏張叔未家朱竹垞檢討稱其精隸書嘗遇之山塘借入骨董肆中見鼎彝刀尺款識悉能誦之文從字順每嘆爲不可及

葉萬著續金石錄用隸釋例多載全文並著其闕字之數行列之式欲以續趙德父之書然編次無法又多複漏

孔尙任藏建初慮僂尺作漢銅尺記周尺考周尺辨三篇極精核又藏母乙鼎及亞尊等器編入積古齋款識

高士奇雅志好古收獲頗富不獨書畫也藏有秦斤銘一百

零二字其拓本爲積古齋款識所收

宋犖鑒賞之精推 國初第一而有力以羅致之書畫之外兼及金石所藏宋拓西嶽華山廟碑竹垞題跋所謂驚心動魄者也

景日昡著說嵩有金石類一卷

龔翔磨居杭州多收藏築玉瓊瓏閣以貯諸物嘗手拓叔夜鼎銘二十字積古齋取以編入款識近梁山舟先生藏有雞形武丁盃馬秋藥先生藏有伯躬父鼎又趙次閑之琛藏有頌壺銘百四十九字卽朱竹垞暴書亭集所跋周司成壺銘是也又藏彭姬壺銘十六字二器惜已散去皆爲

積古齋所收此武林金器故并錄之

楊繩祖究心金石之學嘗跋宋拓夏承碑其碑後爲吳門孝廉陸謹庭所藏

周在浚著天發神讖碑釋文一卷是碑斷裂頗難辨識雪客合其石貫以鉅鐵重爲釋文而以諸家題跋附之

鄭元慶著石柱記箋釋因竹垞太史補舊刻之缺而芷畦爲之賡釋焉太史有序稱其考證詳核廣見博聞洵爲不刊之書

顧仲清著孔林漢碑考中村爲竹翁高弟愛金石偶客濟邑留官舍購得孔林漢碑七紙州學碑四紙文多剝落署中

無金石考諸書對勘逐字揣度註釋稿凡五易而成見自序無刊本

陳奕禧著金石遺文錄十卷漁洋稱其書法晉人於秦漢以來金石文字收弄尤富皆爲題跋辨證然綴論唯漢碑稍多唐碑以後十不逢一意在錄文而不在跋也

陳鵬年著瘞鶴銘考康熙四十六年官鎮江知府募工出石於江中陷之焦山亭壁間其石分而爲五所存七十七字又不全九字其無字處以空石補之益爲完善此碑若非文恪安得復顯於世乎

汪士鋐著瘞鶴銘考一卷此碑張力臣得字六十九陳滄洲

搜石出後存七十七字又不全九字退谷備采昔人之論  
并引張說而折衷之以陳所出石本爲圖列諸卷首彙爲  
此考搜羅極稱詳盡

查慎行勤考訂嘗於馬氏道古樓見宋王復齋所藏鐘鼎款  
識冊內周叔姬鼎季嬭鼎麻城鼎癸亥父己鬲鼎凡四器  
古篆爲之訂正詮釋字義皆能精當

吳涵石門人康熙三十一年任順天府府丞移李北海書李  
秀殘碑二礎於文丞相祠作雲麾將軍斷碑記吳君保護  
是碑其功甚偉使後人猶得以殘闕摹本共相珍玩朱文  
藻碧溪文集曾有敘論極稱之

王著著天發神讖碑考陽羨國山碑考二種弟槩有天發神  
讖碑補考其所作此碑賦注目爲天紀碑非也卽補考中  
亦有誤處

王澍著虛舟題跋竹雲題跋吏部以工書名海內跋尾皆其  
臨摹古碑帖時所書半以論書法之優劣然史書之闕繆  
亦皆辨證則又同於歐趙之用心也陳焯亦精考古吏部  
題跋遺稿賴其摭藏付梓以成完書張文魚金石契中錄  
其兩嗇錢說甚確當又石鼓釋存中亦引其說

蔣衡每得古碑必跋而鑑賞之其臨摹之功不減虛舟吏部  
手書十三經進 呈已邀刊石於太學更爲稽古之榮

秦伯厓收藏之富甲於關陝藏石刻文有千種俱裝大冊每冊前有石刻八分書大字裝首係其子繼成之者積古齋款識錄其師酉敦蓋銘各一百零八字手搨本

何琦留心金石遊曲阜得孔褒碑于郊外水濱因載歸於廟自題字于碑陰金壽門云琦字禮康居閩中雍正年間人楊賓著鐵函齋書跋大瓢深於考古其所論列皆有證據翁嵩年收藏古刻甚富每多題跋

何焯深於考據金石之學時有題跋散見各碑

顧藹吉著隸釋八卷婁機以後續出之碑悉爲採掇後附碑考二卷碑之存者註今在某處亡者引某書云在某處具

有引證與婁機字原可以相輔而行

萬經著分隸偶存內有漢魏碑考僅二十一種而論多詳核褚峻著金石經眼錄千峰自爲摹圖牛階平補說以已所親見之碑縮於邊幅而摹勒之共碑四十有七斷跌殘碣之形雨蝕苔侵之迹無不在目自有金石書以來未有此製千峰實爲創體也

牛運震贊成褚千峰成金石經眼錄而爲之說復每碑爲之贊殊爲蛇足後得巴里坤新出裴岑紀功碑改名金石圖下卷益以魏吳以下迄於唐六十圖但於一碑之中約取數十字而具說於其上大不比前刻之精善耳

吳玉搢著金石存十五卷自一至五篆碑自六至十五隸碑  
共一百二十通俱錄全文惟易篆隸爲楷耳考據皆能精  
博向有鐫本爲波臣取去後李兩邨觀察於京師琉璃廠  
書肆見鈔本題鈍根老人編不知鈍根爲何人以金石癖  
名其書梓之後王述庵司寇又誤語以鈍根老人爲博學  
鴻詞趙搢兩邨遂以其書爲趙搢作列入函海竟不知出  
自山夫先生著述也近李芝齡侍郎重刻金石存於浙江  
學政署徐堅字竹友吳門人與山夫先生友善嘗從淮陰  
市上購得唐唐興寺碑以示山夫錄入金石存山夫稱其  
年少好學嘗從予處見所藏篆隸秘本皆手錄以去且精

于讎勘丹黃燦然將來所詣正未可量也因附錄之

杭世駿著石經考異二卷似未見季野先生書而爲之者二  
家詳略互見亦足補亭林先生所未備而更加詳密爾又  
趙信有石經說以漢石經公羊穀梁皆無正經故魏邯鄲  
淳書春秋正經以補之卽唐志所云今字石經左傳經也  
符會亦有石經說以唐石經補刻之字係尹玉羽蓋移石  
之舉皆出玉羽力也其說皆有獨得卽見考異所引

厲鶚金石無專著然其考訂每有精核處如杭莖浦石經考  
異考核已極精博而樊榭爲之序又引何休公羊傳註證  
漢石經爲一字引孔穎達左傳疏證魏石經爲三字以補

金不學錄卷三  
其所未及又集中觀廣政石經詩景初帳構銅等作俱有  
考訂不獨以韻語見長也

丁敬輯武林金石錄徵君愛金石如性命窮巖絕壁手自摹  
拓證以志乘成此書子傳亦好古有天監八年甄跋

金農研考金石刻所藏多異本漢征西大將軍楊瑾殘碑十  
餘字爲歐趙洪婁諸書所無壽門獨得之吳山夫据以錄  
入金石存又西嶽華山廟碑亦有拓本殘缺止十餘字餘  
或筆畫小損皆可辨認篆額六字亦全較勝于郭允伯所  
藏缺百二十字之本亦見金石存

倪濤著六藝之一四百六卷分六集首列金器款識石刻文

### 字二集

李光暎輯觀妙齋金石文字考略十六卷子中上舍富而好  
禮篤嗜墳典金石出所藏碑六百餘種延同里金心齋介  
復佐其輯錄王萃村籍渠爲之繕寫心齋爲竹垞太史高  
弟華邨爲邁人方伯曾孫皆老儒宿學有所師承其采金  
石之書及地志文集說部之類不下百種實開王司寇萃  
編之先聲唯辨證絕少意在論碑帖法書而存古人之說  
耳然哀錄之功亦鉅矣其書自是可傳

全祖望著鮎埼亭文集其正集三十七卷後外集三十五卷  
多石刻題跋以石鼓文爲必非秦以前物不意謝山而出

此言也

汪師韓著韓門綴學論金石八條

齊召南有錢武肅王鐵券考略

姜任修富於收藏漢郭有道碑久無傳本傅青主鄭谷口兩先生所摹本多不厭人意於是自賴亦摹刻之自謂從寒山趙氏拓本摹得又摹得北海孫氏所藏石經殘碑得中郎筆法以吳炳補桐栢碑之例重補此碑又袁逢曹全諸碑皆有摹本

汪由敦著松泉文集所有碑跋皆能暢達其說  
黃華蕃輯恒山石墨考

盧文弨著抱經堂文集其十五十六卷多碑跋

錢大昕著金石跋尾四冊先生學問無一不精到此書在潛研文集之外王允祿稱其盡掩永叔德父元敬子南亭林竹垞虛舟七家而出其上遂爲古今金石學之冠殆非夸語

嚴長明著知白齋金石類籤金石文字跋尾石經考異漢金石例五岳貞珉考五陵金石志平原石蹟表吳興石蹟表等書侍讀以父憂去官尋丁母憂免喪後引疾不出築室三楹顏曰歸求草堂藏書三萬卷金石文字三千卷日吟詠其中後應畢中丞之招得游太華終南之勝所得金石



刻益富子觀著金陵石刻記錢竹汀詹事序之稱子進濡  
染家學其於金石刻殆廢寢忘食以求之尤以金陵桑梓  
之地訪而拓之始漢迄元以時代爲次錄其全文附以考  
證合一府七縣凡若干種

翁方綱著兩漢金石記二十二卷前列年月表十八卷附魏  
吳石刻八種十九卷隸續補急就章註二十卷隸八分考  
二十一卷補遺末附班馬字類記議論堅卓斷制詳明既  
刻後隨有剽改晚定本尤見精核唯間以詩歌附入與歐  
趙之體又異爾視學廣東又著粵東金石略子樹培著石  
峰草堂鐘鼎考古錢彙考藏有叔丁大林鐘又吳門陸恭

富於收藏有宋揭夏承碑攜至京師以眎覃谿先生爲之  
考論其本末借臨十日而歸之

王鳴盛著蛾術編百卷其目有十曰說錄說字說地說制說  
人說物說集說刻說通說系蓋仿王伯厚顧亭林之意而  
援引尤爲博瞻光祿與錢詹事爲內兄弟兩人同居燕邸  
每得一碑輒互出以相品隲及先後歸田詹事先成跋尾  
光祿爲之序云未暇別成一書後是編成其論金石諸篇  
博辨固不讓於詹事也

汪孟錫著考證金石文二卷

錢載藏晉咸和四年甄乾隆初武康人蔡芳逸於屋後培土

見一穴極深啟之乃古墓墓有七壙皆磚甃兩面無字左側有咸和四年八月立七字右側無字上側刻是戊二字下側刻一錢有好郭郭外復作四出文籀石侍郎得其二汪康古舍人得其一形製款識並同侍郎拓其文貽錢竹汀詹事今載其事於跋尾又姜實節有吳寶鼎甃跋伊湯安前守嘉興時跋孫吳潘儒南墓甃沈大成跋梁天監八年甃胡虔記漢萬歲甃江德地跋五鳳三年甃

朱筠督學安徽時蒐所部金石遺文得二百餘通成安徽金石志三卷精小學釋羊子弋芊爲羊謂芊不上出且子爵無與姓連稱者是羊子爲大夫時周文學渠釋爲芊謂楚

姓今積古齋定羊字

馮浩著孟亭詩文集內有石刻題跋

紀昀學問淵博好金石文字藏周公華鐘銘九十三字其周字甚難識程易疇定爲古篆文周字莊進士述祖釋爲邾公五等之爵於其國皆稱公也

周春居海昌以進士出宰岑溪歸戲門著書老而彌篤搜羅金石甚富考訂亦精陳默齋騎尉藏古金器有銘大令釋篆文爲聶姐媼作安壺六字且審定其物當是嚴仲子爲聶政母作也因賦長歌自爲注釋

畢宏述與王虛舟蔣湘帆爲金石文字交藏古刻甚富作夏

金石學錄卷三  
承碑考兩漢金石記引其說其碑之真本現爲張未未所藏孫星海曾孫梧俱能世其家學

董金甌精篆隸收藏漢碑甚多并古瓦搨本翁氏金石記所錄長樂未央四字橫書瓦卽其所藏物又嘗於嵩山搨剔石闕今所傳少室東闕題名十六字前人皆未之見金甌洛陽人仲子菽憲工篆隸尤好金石碑刻罄家購之所得甚夥築友漢堂貯之山陰童二樹游洛陽曾手摹其華山廟雙鈎本卽郭允伯本據云此碑之外尙有蔡中郎所書楊震宋搨本真絕代寶也

盛百二精考據以進士出宰山左時濟邑人李東琪得斷碑於州學戟門內大成殿西階下古樹之根驗隸續知是漢膠東令王君廟門碑大令相與訂證爲之跋凡得字五十九又半字三十二

藍嘉瑄以濟邑學有鄭固碑中一段久埋地中於乾隆四十三年掘起尺許得六十字又半字五先是雍正六年李鵬於泮池左發得是碑最下一段凡二十字又半字四皆有功於是碑又是年膠州人崔儒眎得故廬江太守范府君碑額於濟邑龍門坊水口今移學宮戟門內

金石學錄卷三

金石學錄卷四

嘉興李遇孫輯

國朝下

畢沅著關中金石記八卷尙書再涖陝西又兩攝蘭州之節  
哀各郡邑前後所得金石刻七百九十七通始秦漢迄於  
金元鉤稽經史抉擿異同條舉而件繫之以成此書雍涼  
之奇秀畢萃於是矣撫河南輯中州金石記五卷搜採亦  
極精博撫山左與阮雲臺師又同成山左金石志

黃叔璥輯中州金石考八卷爲河南開歸道時所輯專錄中  
州諸石刻以各州郡縣編次自商周至元明蒐採頗富唯

金石錄卷四  
一  
所載金石不註存亡據前人所述概爲錄入亦非紀實之意

劉青藜著續金石錄四卷計跋一百餘首頗有辨證

武億著授堂金石跋有正跋續跋三跋考訂精博亦潛研之流亞也又輯偃師遺文記晉關中侯劉韜墓志石今藏其家

王昶著金石萃編百六十卷侍郎弱冠嗜金石及宦游所至無不訪求自三代至遼金積千五百通而甄錄之其文漫漶見於他書者則爲旁註以記其全篆隸及見古文別體者摹其點畫加以訓釋凡題額碑陰兩側亦必詳載碑制

之長短寬博取建初慮僂尺度其分寸并志其行字之數諸家題跋見於金石諸書文集所載者悉著於編金石之書至此可謂集大成矣

謝啟昆輯粵西金石略十五卷自晉至元錄碑四百八十餘種後埤銅鼓考又因崕谷榛莽中搜討有所未及或其石已亡而世有拓本作待訪碑目附於末

石韞玉喜蓄古人金石文著獨學廬稿初稿內有石鼓文辨會谿銅柱述二篇二稿內有碑跋三十餘則

孫星衍輯寰宇訪碑錄及六朝金石考觀察少游陝幕與錢獻之洪稚存兩先生佐秋颿制軍成關中金石記一書切

金不學錄卷四  
三  
劇有素後致仕歸惟以著書爲樂博通淹雅海內宗之平生搜羅三代金器及漢魏以來石刻不少藏有楚良臣余義鐘七十四字有釋文與所藏虞彝四十一字皆爲積古齋欵識所收顧廣圻精考訂之學與觀察交甚契合觀察因陶南邨古刻叢編隨得隨鈔難於觀覽欲用時代重編屬其校刊之予見三跋皆有考證并識其古刻第二行四篆字爲淮西道院引夏竦古文四聲韻說文山部窻重文院爲證甚爲精確後延至金陵館舍襄校各書李貽德性嗜金石文凡古刻入手卽博採經史以考證之久館金陵爲觀察高弟吳修精鑒賞亦與觀察友善所藏金石摹本

俱觀察爲之題識唐處士包公夫人墓誌磚趙晉齋得之西溪今藏思亭切偲怡齋

洪亮吉嘗客畢尙書幕佐成關中中州兩金石記自謂金石之學素寡究心而輿地之嗜幾于成癖每假尙書碑數百通校史傳闕遺其間得史文之誤者十之三以史文正碑石之失者亦十之一又謂金石之失有卽可以金石正之者歷舉古碑以證明之又推酈善長于金石學獨能見其大見所作兩金石記後序

阮宮保元輯積古齋鐘鼎彝器欵識與薛氏同其體例而精博過之近時講金石之學者金少而石多吾師此書專以

欵識名爲薛氏後不可缺之書薛尚功所輯其四百九十  
三器而積古齋有五百六十器之多絕後超前殆無其匹  
所著學經室文集亦多考證金石之文又重摹天一閣所  
藏北宋本石鼓文西嶽華山廟碑又石經儀禮考皆有功  
於金石視學山東時成山左金石志二十四卷撫浙時復  
輯兩浙金石志朱爲弼酷嗜古金文字師稱其能辨識疑  
文稽考古籍國邑大夫之名有可補經傳所未備者偏旁  
篆籀之字有可補說文所未及者開府兩浙招至節署贊  
成欵識一書又師輯山左金石志引朱朗齋及何夢華爲  
助同事者除武虛谷段赤亭顏運生桂未谷李鐵橋俱另

見外尚有江鳳夔陸繩李伊晉師稱其雅志好古藏獲頗  
富晉任城太守孫夫人碑卽江秬香於新泰縣張孫莊搜  
得始傳於世

黃易著小蓬萊閣金石文字秋盦司馬嗜奇好古每游一處  
必訪求古碑之存亡於濟邑州學扶升鄭固碑得拓其全  
石復於嘉祥縣南之紫雲山得敦煌長史武班碑及武氏  
石闕銘遂盡得武氏石室所刻畫像又得孔子見老子象  
及祥瑞圖石刻於是移孔子見老子象一石於濟邑州學  
而萃諸石卽其地爲堂垣砌而堅之榜曰武氏祠堂俾土  
人世守焉厥功甚鉅襄其事者爲州人李東琪洪洞李克

正南明高正炎實同著搜碑之勞云東琪於乾隆己酉暮春督工拓碑復得范巨卿殘碑於櫺星門西壁根不禁狂喜遂移與先得之額並列焉爰爲之記翁覃谿先生寄李鐵橋兼呈秋庵詩有任城寶墨熊光起天意助成黃與李之句又父己鬲鼎銘二十八字積古齋收入款識卽東琪藏物也

桂馥著札樸十卷大令學問精到博通經史考據是其擅長扎樸第八卷論金石文字頗詳審此書大令歿後刻於淞江前之碑石題跋見於各書者已不少其所藏右軍戈編入積古齋款識

孔繼涵藏有周芋子戈所著微波榭遺書內宋石經記一篇幾及三千言考證最詳言石經遷徙變置者五其殘缺散佚皆由於此非楊璉取之去也朱檢討石經考於刊刻後先字行增損碑數移置廢葺未能通核折衷之

顏崇榘博學嗜古收藏宋戴公戈周距末阿武戈等器俱編入積古齋款識又藏宋印六孔荏谷爲記之其距末不知何器銘八字小篆用金填畫沈心醇據戰國策蘇秦說韓王曰谿子少府時力距來皆射六百步之外釋此爲弩飾錢大昭爲竹汀詹事弟學問淹博著書甚多曾刻可廬著述序例一冊其於金石亦有考訂桂未谷所藏右軍戈銘十



四字先生以篆文奇古非東漢人所能及定爲秦器說甚  
詳核子東垣繹侗皆精考據東垣著嘉定金石考二卷自  
元以上皆錄全文附以考證又豐宮瓦考見孽經室文集  
所引繹著小廬隨筆亦有校正金石文侗爲王述庵司寇  
所賞識招至三泖漁莊畀以編校之役萃編之成與有功  
焉其所釋碧落碑考證精博卽載萃編

程瑤田著通藝錄易疇孝廉係歛產精考訂之學著述皆有  
根柢通藝錄中跋夏承碑一通極詳核又積古齋款識中  
屢引其說象形句兵周幼衣斧立戈父癸鼎諸器皆有釋  
文

秦恩復篤嗜古金所藏都公敦曾中盤冊父考盃陽嘉洗孔  
文父鐘陽泉使者薰鑪等器及舊拓款識俱爲積古齋所  
收

沈可培世居嘉興竹林里以進士出宰上高及安肅與兄可  
均俱留意書畫及金石文字大令著述甚多藏有商父乙  
觶子銘彝亦精考古有寶正輒記

金德輿嗜書畫金石賞鑒精核居桐鄉築桐華館於崔糜堂  
之東偏以儲古物藏平易封宮舉契岳鄂王祠銅爵一時  
題詠甚多又藏賈秋壑所刻鍾太傅宣示表原石今歸張  
叔未家又藏吳越忠懿王金塗塢一版可據以正周簪谷

金石錄卷四  
朱竹垞兩先生說之謬同時陳默齋騎尉亦藏錢氏金塗  
塢四面俱全足資考證默齋又藏宗周鐘百二十字與鄂  
巖之舉契皆編入積古齋款識又蕭山祇園寺有周顯德  
舍利塢蔡雲白茂才爲之記陳名廣凝蔡名英

朱楓輯雍州金石記又秦漢瓦圖記古金待問錄

程敦輯秦漢瓦當文字其所藏舊搨款識皆編入積古齋嘗  
釋王莽時八風壽存當瓦以正朱排山釋爲益壽存富之  
誤

申兆定陽曲人以孝廉官終白水縣知縣著涵真閣漢碑文  
字跋平生癖于金石到處搜羅善八分手摹漢碑數十種

將刻石未果

巴慰祖歛人少好刻印務窮其學旁及鐘鼎款識秦漢石刻  
遂工隸書故富家中落賣其碑刻尙三千金然其愛之彌  
甚節嗇衣食時復買之藏有漢劉熊碑雙鈞本凡二百十  
八字內多洪氏所闕者四字少四百十一字并有釋文

汪中江都人自言十四五歲卽喜蓄金石文字誤述學內外  
篇孫淵如先生信馬定國之說以石鼓爲宇文周時物容  
甫作五證辨其非無不精確所著漢鴈足鐙槃銘釋文又  
王基碑雲麾將軍碑高府君墓誌諸跋尾皆詳審而考証  
之藏劉熊碑宋拓本多出巴子籍本者二十八字補洪氏

所闕者十三字正其誤者一字東漢射陽畫像石亦藏容甫家海昌俞思謙因近人汪韓門周耕厓皆信馬定國以石鼓爲宇文周之物著五可疑以糾正之亦極博辨載孫氏讀書脞錄惟又以為秦文公物凡鼓文中所云天子者俱祝平王之詞未免多此支節予以爲石鼓之指爲宣王時作在唐人自有相承舊說猶詩之有小序後人臆說皆可廢也

張埴所論古碑皆有考證兩漢金石記屢引其說

陳以綱著竹葉碑釋文凡六十餘字兩漢金石記述之并載其跋以綱海昌人以諸生終遊京師與覃溪先生爲金石

交

陳鱣精考證之學築果園於硤石山麓藏經籍金石數百種著松研齋隨筆兩漢金石記錄其吳國山碑跋同時海昌之言金石者有陳均能識鐘鼎篆文徧游都門關中江右粵東等省收穫日富築十三漢鏡齋以居徐紹曾爲周松靄大令弟子愛石刻日以摩挲古碑爲樂藏北宋二體石經周禮殘本實爲罕覩松靄大令任岑溪時土人掘山地得銅鼓一面底俱平底有銘古篆陽文人不能識攜搨本歸命壽魚考釋得四十字五韻有龍集庚午月建在卯云云其服其博與許榘亦究心古學吳山夫金石存李侍郎

屬其校而刊之藏有千秋長安駘湯萬年二瓦當爲孫淵  
如觀察所未錄

丁杰精考核以漢太學石經稱鴻都石經者誤著辨正之兩  
漢金石記引其論石刻甚多皆有所訂證

李文藻爲錢竹汀詹事主試山東所得士生平愛聚書於金  
石刻搜羅尤富所過學宮寺觀巖洞岨壁必停驂周覽有  
僕劉福壽善椎拓攜紙墨以從有所得則盡拓之宰粵東  
時嘗乘舟出迎制府小憇南海廟命僕拓碑秉燭竟夜比  
曉問制府舟已過矣其風致如此見詹事所作李南澗墓  
志銘又嘗手拓廣州光孝寺龔澄樞造鐵塔記及造千佛

寶塔記以正朱檢討所謂劉鋹所鑄二塔竝立一屋中一  
作記一題名之誤

李調元著蜀碑記補因王象之輿地碑目所載東南十六路  
於蜀刻尤加詳細其摭取尙不無挂漏之嫌雨邨補之每  
卷先以王所得列於前爲上卷而以已所得列於後爲下  
卷其合爲十卷又於下卷中分王本所未有而增入者曰  
補王本所已有而釐訂者曰考俱遵 國朝郡縣名標之  
汪照著古石瑯玕

王復爲穀原先生子以考職出爲宰受知畢秋颿尙書爲作  
晚晴軒詩序性愛金石令偃師時以邑人武虛谷先有偃

師金石遺文錄四卷秋塍續補之廣爲十六卷山陰童二如鈺精考據延至幕中相與訂證引其說頗多其書刊於中州嘉慶庚申修嘉興府志時不列於金石類余從鍾映淵敬濤處假得始著於錄映淵亦好古士收蓄碑版甚富有題跋

陸超曾擅分隸嗜金石晉瓦券跋頗精核藏有吉羊洗蔣心餘編修翁覃谿學士程魚門編修各紀以詩

江德量以父子九太守名恂者故好金石之文多所搜輯幼卽世其學所藏舊款識拓本約二十種俱編入積古齋書中釋散氏銅盤銘述庵司寇稱其精審釋之者又有孔廣

森樊明徵汪肇龍吳穎芳各有心得

趙秉冲有賜石齋碑錄所藏戎都鼎吳彝菑川太子爐及款識搨本六十餘種俱收入積古齋書中

段玉裁精研訓詁之學著說文註等書洪氏隸續載魏三體石經左傳遺字蓋卽洛陽蘇望摹刻本懋堂大令諦審之知有尙書大誥呂刑諸篇文錯雜其間錢詹事稱爲向來考石經者未之聞也然臧氏經義雜記中已有此說

邢澍據現在所見唐宋以前金石刻並宋元刊本隸釋隸續等書著金石文字辨異十二卷又著西秦藝文志八十卷中錄金石甚多又同孫淵如觀察作寰宇訪碑錄

金石學錄卷四  
吳騫著國山碑考槎客以著述爲事經籍金石考訂必精以  
澁業在荆谿每往來其間碑在縣境因訪而釋之又著唐  
開成石經考異蜀石經毛詩殘本考異所著愚谷文存中  
亦多金石刻跋又著辨以訂孔東塘漢銅尺記周尺考周  
尺辨之譌

張燕昌著金石契三吳古磚錄又重摹北宋石鼓文著石鼓  
文釋存文魚居武原篤嗜古金石築石鼓亭於家中一時  
名公卿咸與之訂交錢竹汀詹事作石鼓亭記以贈之抱  
經學士作秋帆尙書關中金石記序略舉 國朝爲金石  
之學者十三家起於崑山秀水而終於文魚其推許亦可

謂至矣子開福能繼家學著續三吳古磚錄又與文魚賞  
奇析疑同嗜金石者有吾竹房藏臬伯卣蓋錢柞谿藏石  
刻甚富吾名進錢名本誠俱海鹽人

錢坫著十六長樂堂古器款識澣花拜石軒古鏡文俱考證  
精核又芻鼎銘釋文乾隆戊戌歲巡撫畢公得於長安卽  
屬獻之爲釋文共得一百三十二字所藏款識拓本十餘  
種俱收入積古齋書中

吳東發著石鼓文辨讀釋文等七種又芻鼎銘釋文侃叔人  
品高潔貫穿經典而於金石亦癖嗜吳槎客稱其好學如  
楊南仲博雅如劉原父於秦漢碑版鐘鼎篆籀靡弗鑽研

蒐討旁通曲暢以證之

溫汝遂篤嗜古金石刻潘有爲亦精甄錄皆番禺人粵東爲金石學者當首推兩君殆歐陽文忠所謂好古而有力者予從琅嬛僊館鈔得潘毅堂所藏古泉目自幣貨以迄時錢有一千三四百品儘多異聞罕見者可稱收集之勤矣因述其會粹金石而及之亦足以見一班爾張叔未所藏子執旂句兵向爲毅堂所藏

江藩究心金石文東明尊銘十九字陳逆簠銘七十七字皆有釋文所藏款識拓本皆編入積古齋書中嘗藏新莽貨泉范底有母字錢詹事泉母之說本此江聲爲之記

朱文藻著校訂隸釋存疑及濟邑金石志等書朗齋少爲述庵司寇所賞識屬其採錄金石諸說以資考證後客京師寓韓城王文端公邸第值文端充續西清古鑒館總裁得見內府儲藏尊彝古器摹本三百餘種後又客任城黃小松司馬署得見濟邑一州古今碑拓數百種繼客濟南赴阮雲臺師之招時視學山左徧蒐碑碣得見全省拓本千數百種贊成山左金石志後倦游家居適司寇歸田將訂金石萃編招朗齋與錢君同人襄其役下榻三泖漁莊凡三易稿五易寒暑而始竣事又得見司寇所藏寰宇碑摹一千五百餘種自謂畢生能窺金石之美富殆有天

焉

趙魏著蜀石經周禮夏官殘碑考鴈足鐙銘考金石題跋散見各書皆簡核可取晉齋少好遠游搜訪古刻藏碑三四千通雖值窮乏寶此不失其所藏款識搨本七十餘種俱編入積古齋款識

陳豫鍾收藏古金款識甚多積古齋錄其搨本二十餘種段松苓著益都金石志又益都孝廉李廓藏紀侯鍾積古齋編入款識武虛谷金石跋亦載其器而釋之

聶欽著泰山金石志

瞿中溶爲錢詹事壻好金石有唐雞林道經略使官印記金

都統官印記又許宗彥亦有雞林道經略使印記爲雲臺師作

周廣業輯唐石經補考又著客院錄有都司空瓦考又費士璣有瓦當考因錢旣勤釋耕爲豐定爲成周豐宮瓦引鄭康成大射儀注爲證士璣引漢書地理志新豐縣疑是新豐宮瓦文以備一說又吳晉有長樂萬歲瓦跋

曹秉鈞居禾城號種梅著元延銷跋載兩漢金石記案元延銷卽三斗銷向藏嘉興黃大令思堂家後爲文後山鼎所得後山精鑒別金石亦能考核得此器後卽以三斗銷顏其齋翁覃溪先生爲之書扁又兩漢金石記言嘉興姚弼



齋江春以元延錙拓本并曹種棗跋來京師始載入記中并云弼齋少年嗜古僑居京師與子次兒樹培往復考核金石文字迺甫歸里而疾卒傷其有志未就因附書於此俾其姓名託茲編以弗湮也因並錄之

朱邦經著南宋石經考嘗司教杭州府學堯石經碑明正德十三年直指使宋廷佐由仁和移至郡庠現在櫺星門內兩廊壁間友崔手拓碑文於每碑標題起訖以資考證計存八十六碑并辨明憲聖皇后代書事出於埵會

吳文溥輯南野草堂漢唐石刻目錄澹川客關中時購得漢唐石刻拓本二百餘通鈔而存其目年月州縣撰書人姓

氏及文字之全缺無不於目下註之殊爲清晰

張廷濟住嘉興新篁里鑒賞精博一古金石入手卽能知其真偽別其原流所藏商周秦漢古彝器銘文千種有現今收藏家所未著錄者翁覃溪學士與之往復考論多所辨析所藏石刻自石鼓文以下至宋金亦千種實有數十年舊搨而其石今已全佚者藏器中鐘鼎尊彝之屬六十餘種絕無偽造其周諸女方爵秦始皇時度則寰宇中所僅有者藏石有唐天寶七載修子產廟殘碑顏魯公元靜先生殘石蘇文忠馬券碑舊石賈秋壑所刻鍾太傅宣示表宋時覆刻淳化殘帖金元刻蘭亭諸石皆精出近時覆

刻倍倍金石之外所藏如漢晉古甄秦漢古瓦漢魏至宋  
元古官私印周秦以來錢幣皆不讓古收藏家其爲積古  
齋款識所收自冊父乙尊以下凡八九器蓋未盡載錄也  
所著有清儀閣集古款識考金石刻題跋金石奇緣墨林  
清話等書叔未之兄灝曾登焦山親拓瘞鶴銘五石共拓  
爲一大幅并拓出爽塏石下有小字四行十數字爲從前  
金石家所未道弟沅藏有諸女尊祖辛敦二器編入積古  
齋款識又有永興元年堂狼造之洗晉咸和二年甄翁學  
士爲之銘亦佳物也從子柟藏有山父壬彝禾季彝犧形  
爵樂仲洗大吉羊洗龍虎鹿轆鐙等器一門群從無不以

金石名學又葛嵩藏有商父乙觚周華姬鼎遣小子敦漢  
宜子鐙吳越寶正甄等物王幾藏有周史頌盤王銘壽藏  
有漢嚴氏洗此皆古彝器之現存其家與叔未景弟稱金  
石交朝夕切磋互相訂證今其人或存或亡而備錄之以  
見此鄉多好古之士焉

宋保醇山右孝廉號芝山爲翁覃谿學士門下士篤嗜金石  
老而流寓吳越間東南好古之士無不與之相契所藏古  
金石刻之至精者皆爲張叔未所得

黃錫蕃居海鹽擅分隸亦精於蒐討嘗集諸家散氏盤銘釋  
文折衷已說彙成一冊所藏款識裝界十鉅冊曾於張叔

未案頭見之今爲上海陳寄礪所得著續古印式二卷金石表六卷刻碑姓氏錄一卷

陳鴻壽輯續金石萃編鈕匪石與之同輯丙子冬間晤曼生悉已得八卷今曼生已亡其書未刻匪石名樹玉曾著說文新附考錢詹事序而刊之

嚴可均著唐石經校文

張鑑居湖州南潯鎮精於考古爲劉阮二官保師所深器嘗著墨妙亭碑目考及古甃記等書其碑目考自序畧云孫公墨妙亭石刻迄今七百載而石與拓本存者絕少余以聞見所及疏而出之有鄭氏蒞畦所未知者然亦十纔得

其六七耳異日苟有能發府治之沮洳而復樹之則斯錄之逸者存闕者補邑之幸非卽此書之幸歟

徐熊飛博雅好古每得武康山中古甃以考核之游焦山手拓無專鼎銘九十四字以歸雲臺師取以編款識

李富孫釋漢唐石經異文及北宋周禮殘碑援據精確又嘗仿王止仲例以洪氏隸釋隸續所載益以六朝人碑製爲漢魏六朝墓銘纂例阮雲臺師見之謂碑碣當以漢魏爲法六朝猶不失遺意屬其將原文及碑式跋寸並爲載入俾古制有所考又郭麐著金石例補一卷汪選樓序之

何元錫嗜金石收弄亦多游山左於聖林廡外得孔君墓碣

移置廟內雲臺師爲記之又以漢刻公乘伯喬題名殘碑  
貞女龍鳳墓闕永初官鑿文三種重摹勒石寘於南昌儒  
學齋廡原刻爲趙晉齋所藏今爲張叔未購得

翁廣平著金石集錄海邨居吳江之平望鎮博雅好古所跋  
金石刻各種皆有典據

嚴杰著重樞天一閣北宋石鼓文考宋高宗石經考厚民究  
心古學爲雲臺師所賞識久館節署十三經校勘記等書  
皆面承指示而助成之又趙春沂亦有天一閣石鼓考孫  
同元有宋高宗御書石經考金廷棟著石經穀梁傳考洪  
震煊著西漢陶陵鼎考俱見詒經精舍文集

汪家禧攻苦力學長七略之學辨析古籍無豪髮爽於金石  
亦篤嗜而審核之今所存者惟西嶽峯山碑考一篇刻之  
東里生燼餘集中

錢泳工分隸攀雲閣帖臨漢隸四十餘種近更縮臨唐碑亦  
不下百種廣陵鮑氏刊之其致力於金石者深矣又嘗以  
論語孝經大學中庸分書刻石嵌於蘇州府學壁間

司馬直居金陵好古多藏弄有束彘瑀戈陽武劍諸物收入  
積古齋欵識其瑀字程易疇據周公華鐘銘周字比例推  
詳定爲瑀之省文

李聘工分隸頗研心金石之學僑寓武原時與張文魚徵君

游獲其緒論嘗藏漢少室石闕畫象吳槎客爲之跋今歸張叔未又從海濱得五鳳三年甄贈雲臺師攜至京師翁覃谿先生見之爲作五鳳三年甄考又藏大吉羊宜用洗載入文魚所著金石契中後歸梅里所藏諸物漸散去無存所著有漢碑奇字漢隸解異等書

戴光曾酷嗜舊碑法帖遇有精本摻采前人題跋語而折衷已說書於後嘗藏郭有道碑係禾中褚氏於乾隆四年翻刻之元本褚氏藏此碑已百餘年實爲宋拓色澤甚古筆法變化不測非傅青主鄭谷口姜自耘臨摹之本所能髣髴松門購得之矜祕不輕以示人余往禾城必到從好齋

中縱觀古刻不忍釋手不料辛巳秋闈後一病不起老友云亡傷如之何因輯金石學錄而增其姓氏爲之泣然

斌良著壽金庵金石款識已卯庚辰間任江蘇糧儲道余與張叔未孝廉游虞山之便往訪署齋出視所藏銅器二百餘件摩挲終日目不暇給爲之定真贋辨文字其收藏可謂富矣藏有光和二年量邊款九十餘字底同側有陽安二隸書爲金器中絕品又素方伯訥收獲彝器甚富藏有叔氏大林鐘與翁宜泉所藏者同文惟氏字明顯不比翁鐘字已剝蝕所以著錄者誤爲丁字也所藏尊彝等尙有十餘事

馮登府著漢魏蜀石經補考以辨古今文之異同唐石經補考以正亭林先生某字誤之非俱有疏證辨論極精當又集古彝器及甄瓦遺文搨本爲金屑石餘二錄考證古今多所發明

鍾振富居桐鄉濮院鎮性愛漢唐碑碣廣爲搜羅不下千種并金器款識皆精裝求名手書簽以時展翫繪秋夜校碑圖題詠甚多趙晉齋張叔未嘗造其廬各出古刻以相質證游吳門購得林同人所藏漢魏碑十冊計十六種內有方印云閩中林侗手校補并裝於三原學古堂頁版俱同人手書碑目摹刻於上精妙絕倫岳洙傳久館於其家同

嗜碑刻著有石刻攷略後附漢碑讀字

馬鉉居海昌傘墅邨擅飛白隸書收古石刻能審度而辨定之所藏古泉不下二千品有極精者游武林購得大泉五十範一枚背有利主事取工主所予八字陽文隸書精湛異常於泉范中稱絕品焉

馬陳潮著續石經考聚諸家之說薈萃成編加案語以補其缺而正其非頗費搜錄之勤

劉喜海爲文恭公師長子幼愛金石所居書室款識石刻縱橫滿几近更尋碑碣之未爲萃編所收者意欲續之搜羅漸廣必有成書也又葉志詵同居京師與燕亭嗜金石亦

同所藏款識及漢印甚富

阮亨著瀛舟筆譚內錄金石文三卷

陳經著求古精舍金石圖四卷前摹金器圖縮本頗精工并及刀布鑑印剛卯之屬後摹古甄款識圖同時丁曉樓王二樵鈕葦村各藏漢晉古磚數十種俱有搨本流傳丁名口王名獻鈕名口

徐同栢爲張叔未孝廉之甥好古能識奇字叔未每得款識之難辨者屬其細意融會卽豁然通解著崇古堂古金考古履仁鄉金石文字記

錢汝著上虞金石考錢旣勤令上虞保舉應孝廉方正徵稱

其書摭羅頗富考證亦精

周中孚嘗以漢學受知於雲臺師著述甚富以隱修經業署印著金石識小錄及杭嘉湖道古甄目

龔時珍仁和閣齋觀察之子著述甚富旁及金石文字藏弄八百餘種皆世所不經見惜燬于火


徐渭仁通金石之學摭采漢唐諸刻補王氏萃編所闕者若干卷兼工篆隸李筠嘉有慈雲樓藏書數萬卷金石文字千餘種輯藏書志及金石目梅益徵精於鑒別所摭古石刻足與徐氏相伯仲嘗下搨慈雲樓佐輯金石目等書紀大復著古甄品又工篆刻及漢隸俱上海人

陳璜吳人僑居上海癖嗜金石收集鍾鼎款識及漢唐碑版  
漢晉古甄同貯一室名曰澤古齋著有古甄錄足補歐趙  
之闕近延武原黃椒升張質明兩君同輯金石萃編補遺  
金石萃編校勘記續金石萃編夏世堂建安諸生幼隨父  
宦於上海嘗集漢唐石刻補王氏萃編之闕

馮雲鵷江南通州人官膠州知州刻有續金石圖於山左諸  
石刻搜採更備

姚觀光能文嗜古搜羅書畫金石甚富藏有夔作尊寶彝敦  
子牙爵子孫作婦姑鬯彝戲等器築墨林如意之室以貯  
諸古物蓋六榆先得天籟閣所製鐵如意一柄銘辭二十

四字極精好張叔未孝廉爲隸書扁以顏之石刻中藏唐  
刻宋搨黃庭經一本有王覺斯孫退谷何義門諸跋是宋  
思陵內府物黃庭傳本無出其右向爲吾里杜氏所藏後  
歸當湖錢夢廬今爲六榆購得夢廬名天樹賞鑑書畫外  
金石亦究心焉





金石學錄卷四



